

ACHHÔH BIE

Biehmiapa	3
-----------	------	---

ACHHUAHNA HNEI AWPA PEIMAWH

BO – 1	Achhuhna Peimawhzie	4
BO – 2	Khizaw liata ei vaw pina chhâ	...	8
BO – 3	A pih pathleipa châ ma pi	11
BO – 4	Na hrona he ahy e a haoh?	14
BO – 5	Khazohpa hmôna Hawhta hmô	18
BO – 6	A to yna chhâ - Khazohpa Rônahna	22

KHAZOHPA ACHHUAHNA – ACHHYNA

BO – 7	Khazohpa achhyna yzie	27
BO – 8	Achhyna liahmaripa – Ahlâna	30
BO – 9	Khazohpa nata aviasana	34
BO – 10	Khazohpa palysapa Achhyna	37
BO – 11	Khazohpa nata eima hla kaw	40

KHAZOHPA ACHHUAHNA – AKAONA

BO – 12	Khazohpa Chhôhkha ta Taona	44
BO – 13	Chhôhkha liata Kyhpachâna	47
BO – 14	Hmaohkha ta Hrona	50
BO – 15	Akaona theilâpa – Adyhna	53
BO – 16	Awnanopa Pabohsana	56

KHAZOHPA ACHHUAHNA – CHAKAONA

BO – 17	Khazohpa rai piepa apyna	60
BO – 18	Khazohpa chakao awpa ta taopa	63
BO – 19	Khazohpa ta Hmopiepa Hmâna	...	67
BO – 20	Sei hawhta Chakaona	71
BO – 21	Chiehleina liata Khazohpa hmotaotheina..		75

KHAZOHPA ACHHUAHNA – KRISTA LYUNA

BO – 22	Krista lyu awpa taopa eima châ	79
BO – 23	Krista lyuna liata Laiseihna	84
BO – 24	Bie Hmeiseihpa ta Hro Pananona	88
BO – 25	Rietheina tawhta Laiseihna	90
BO – 26	Thâtihpha TIô Noh	95
BO – 27	Reipasaona tawhta Laiseihna	101

KHAZOHPA ACHHUAHNA – MISSION

BO – 28	Mission Chakao Awpa ta Taopa	105
BO – 29	Hro khopathiah Thaina	108
BO – 30	Khizaw Pahno Phapa Misawnari	111

BIEHMIAPA

Khazohpa nata Awnanopa khokheina vâta 2024 Apahrana Chhithana Bu pachhuhpanoh awpa ta tovyuh ei topa vâta ABeipa moh ei reithai. Kô 32 chhôn pastor ei vaw chakaona liata einona Apahrana bu ei pachhuhpanohna a châ. 1995 liata "Krizyhpazy Khizaw" tahpa biepi hmâpa ta ei vaw roh hra.

2024 Apahrana Chhithana châta "Khazohpa achhuhna hawhta hrona" tahpa biepipa ei vaw tu. Âchhuh chaipa cha, khizaw liata Khazohpa achhuhna hawhta hroh awpa apeimawhzi palâsa awpa he a châ. He Châbu he, Krizyhp Hrozie chhithana chhao a châ.

Achhôn bie zy he, Rick Warren ta a ropa "Achhuhna ta a haohpa hro' (Purpose Driven Life) tahpa châbu tawhta, la pachhuhpa a châ. Awnanopa châta byhnâ a châ cheingei a, tahpa ei beiseih.

September thlakha chhôn hmâ awpa a châ no ta, Noh kha, noh no tahpa khai leipa ta, Bo-1, Bo-2 tahpa ta ei khai. Châreituhpazy nama pahno thai awpa ei beiseih. ABeipa ta he Châbu hmâpa ta Mara Awnanopa thlâhpa hrop byhnâ pie mawh sy.



Rev. Dr. L. B. Siama
July 20, 2024

BO – 1

ACHHUAHNA HNEI AWPA PEIMAWHZIE

Hmiasai (achhuahpa) y leina liata cha phopi
leidia ei ta, Ryhpa a zyhpa deikua cha
vânoh a to aw (Bieso 29:18)

Khazohpa ta a chyhsazy châta achhuahna a hneipa
hawhta chyhsapa chhao ano châta achhuahna a
hnei hra. Achhuahna a hnei leipa chyhsa cha
hnabeiseih awpa chhao hnei vei.

Chyhsa ta a hrona liata bie a hnei awpa
mâsapa/hmiasai (achhuahpa) a hnei leipa khiahta
cha, cha chyhsa cha âpathliethlaw aw ta, alei dia
aw (Bieso 29:18). Palôh achhuahna hnei awpa ta
chyhsa taovyuh châ ta, hlaotlohna a pietuhpa
deikua cha Khazohpa a châ (Bieso 16:1). Chyhsapa
ta hmiasai sianô kawpa hnei hra sa la, cha
achhuahna cha Khazohpa ta keimo châta â
chhuahpa hawhta a châ leipa khiah hrao leipa a châ
aw. Chavâta Khazohpa ta a chyhsazy châta â
chhuahpa he pahno tua awpa âbyuh.

Achhuahna tahpa he, hmiasai tahpa nata mâsapa
tahpa hawrawh eima hmâh lymâ aw. Khazohpa ta
keimo châta âchhuahpa eima palâsa hlâta, chyhsa

hro liata hmiasai (mâsapa, achhuahna) sianô kawpa hnei awpa a peimawhzie palâsa tua ei si la:

1. Achhuahna âlyupa yna liata cha, hrialâhpa zydua palôhraoh kawpa ta rai ama hria tyh.

Phu/py miakha ta achhuahna sianô kawpa a hnei khiahta cha, hrialâhpa zydua apôhkha kawpa ta, palôh pachâna miakha phaopa ta rei â raoh kawpa ta rai ama hria thai aw. Anodeikua cha pakha nata pakha mâsapa âlyu leipa khiah cha, pachâna nanopa hneipa aw ei ta, hmaohkha ta rai hria thai leipa ta, achhahzaohpa ta ama y aw. Chavâta achhahna y lei nawpa ta, palôh miakha nata pachâna miakha phaopa ta apôhkha thei nawpa ta hmiasai sianôpa hnei awpa apeimawh. (I kaw. 1:10).

2. Achhuahna âlyupa yna liata cha, hrialâhpa zydua hlaotlohna taihta tiama ama papua tyh.

Khazohpa achhuahna liata â-ikawpa ta a duah lymâpa cha, Khazohpa ta a vaih lymâpa vâta thlalôh kawpa ta a y (Is. 26:3). Palôh chybia a hnei leipa, a hmotaopa liata â-i leipa, pathipalôh â zawvawpa chyhsa cha hlaotloh beih aw vei (Zami 1:6-8). Cha hawhpa chyhsa cha khapahrao leipa liata hria pasa aw ta, â tha pahryuh thlâhthli thlâh haw (Is. 49:4).

Mâsapa sianôpa a hneipa deikua cha a mâ hnei kawpa rai a hria tyh.

3. Achhuahna âlyupa chata hrialâhpa zydua hmialâ tôh lymâ awpa ta tha miah a patlô.

Ngiapâna cha hmo hnabeiseihpazy a y tlai tahpa pahnona a châ (Heb. 11:1). Khazohpa ta miah a awna chhâpa cha eima mâsapa a châ. Cha hmiasaipa hriapazihna liata daihti khô chiehpa liata hmo khochhih leipazy a patyhpamâ sa leipa ta, hmialâ sai lymâna chô ta, tôh lymâ awpa a châ (I Kaw. 3:12-14).

4. Achhuahna sianôpa chata mohropazy hrialâh khohna a pahneisa.

Ezra ta Israel chyhsazy cha chipho hropazy nata ahnei pahlao lei awpa ta zawpizy noh a pavâhsa khai nahta, zawpi ta, "thyu la, riahpha kawpa ta tao la, eima cha hrialâh aw, nâma chhâh eima châ aw" ama tah (Ezra 10:4).

5. Achhuahna sianôpa cha raihria hlaotloh, tloh lei pahnona a châ.

Ngiapâna liata nama y tlyma, nâmosasyh ta pasia teh u (2 Kaw. 13:5) tahpa he, raihriapa hlaotloh, tloh lei pasia tyh muh vy, tahna a châ. Tiama kawpa ta rai hria hra ei si la, hmiasai sianôpa a y leipa khiakta cha, eima hlaotloh, tloh lei pahno thei aw

ma pi. Chavâta mäsapa cha hlaotlohna thliena miakha a châ. Khazohpa ta Awnanopa cha ano achhuahna pi patloh awpa ta a aw. Khapa tao awpa ta e miah a aw? Khazohpa ta Awnanopa a pachâsa khohpa he khapa tlai hema a châ? Keimo chyhsa achhuahna (khona) ma peimawh via, Khazohpa achhuahna he maw? Keimo achhuahna hlâta Khazohpa achhuahna a peimawh via. Khizaw liata chyhsa rônahpa nata hlaotlohpa ama tahpazy cha, Khazohpa achhuahna hawhta a taopazy ama châ.

Khazohpa ta "nâmo châta achhuahna ei hnei, nama chhie nawpa châ leipa ta, nama pha nawpa, hmialâ daihti phapa nata hnabeiseihna pie awpa chuh! (Zer. 29:11). *Khazohpa ta chyhsapa châta achhuahpa cha hmialâ achuna liata a y aw.*

Pachâ pahmaoh awpa:

1. Chyhsapa achhuahna hlao patloh awpa ma peimawh via, Khazohpa achhuahna ma?
2. Ngiapâna nata khihsana liata achhuahna (hmiasai, mäsapa) hnei awpa âbyuh, byuh lei reipahmaoh tua si!
3. Chyhsapa hro liata mäsapa hnei awpa a peimawhna kyh reih tua?



BO – 2

KHIZAW LIATA EI VAW PINA CHHÂ

Ano ta ato tao ta, avâ liata a ypazy, alei liata a ypazy, hmô theipazy, hmô thei leipazy, beidyuchhaizy, biehneinazy, ryureinazy nata biehneituhpazy a tao. Ato ano vâta taopa châ ta, ano châta taopa a châ (Kaolaosa 1:16).

Khizaw liata eima vaw pina chhâ he, Khazohpa achhuahna tawhta achu awpa âbyuh. Chyhsapa cha "KEI" tahpa sasyh liata âbôpa ta a hro khohpa eima châ. **Ei** hrona, **ei** châ khohpa, **ei** chhuahpa, **ei** mâsapa, **ei** hmiasai...hpz. eima tah tyh. Chyhsa to ta eima chhuahna hlaotloh thei nawpa ta Khazohpa cha eima hmâ khoh. Cha cha eima ngiapâna chhâ chhao a châ hra.

Hrona liata Khazohpa ma hmia eima pasâh aw, chyhsapa ma? Chyhsapa vâta Khazohpa a ypa châ leipa ta, Khazohpa vâta chyhsapa a ypa tlao a châ. Chyhsa achhuahna hlao patlohpa awpa ta Khazohpa a ypa châ vei; Khazohpa achhuahna hlao patloh awpa ta chyhsapa he taopa tlao a châ. "Ei pachâna he nâma pachâna châ leipa ta, ei hrozie chhao, nama hrozie châ hra vei. Avâzy khieh alei hlâta â sâh viapa hawhta, ei pachâpazy cha nâma pachâpa

hlâta â sâh via” Khazohpa ta a tah (Is. 55:8-9).
Khazohpa cha na hrona âthaona deita châ vei, na
hrona hnawh chhao a châ. Khazohpa leilô y hlâta
ano rônahna châta chyhsapa a tao. Khazohpa cha
ano kyh a pachâpazy châta hmo âchhuahpa a hnei
(Rm. 2:7-9).

Krista liata `kei he ahy tlai ma ei châ? `kheih hawhta
hro awpa ta taopa ma ei châ’ tahpa eima hmô.
Krista Thâtihipha eima thei hlâ tlaita, Khazohpa ta
chyhsapa cha `a ryu’ châta tao ta, Khazohpa
Rônahna Reithai awpa ta’ maniah a rao chhielie
(Eph. 1:11-12) tahpa bie nyupa eima pahno.

1. Zisu Krista nata azaona hneina tawh deita ta,
eima châna nata Khazohpa ta eima châta
âchhuahpa cha pahno theipa a châ.
2. Khizaw liata eima vaw pi hlâta, Khazohpa ta
eima châta achhuahna cha a rao chiehpa, a tao
chiehpa a châ. Eima kaolâh awpa nata rai eima
hria khohpa cha khoh eima tlyh thei aw.
Chahrasala, keimo kyh liata Khazohpa
achhuahna deikua kho â tlyh thaipa châ vei;
Khazohpa ta a tao chiehpa a châ.
3. Khazohpa ta eima châta âchhuahpa cha khizaw
hro chhôn châ deita châ vei; chhâzaw nata
tlyzaw châta chhao a châ. Khazohpa leipa ta
chyhsa hrona he yzie rai hnei vei. Hrona a
hneipazy nata chyhsa husona cha Khazohpa

prôkara (achhuahna) hawhta a sie lymâpa a châ (Zawba 12:10).

Chavâta nâ cha Khazohpa vâta taopa châ ta, Khazohpa châta taopa (Kao 1:16); Khazohpa rônahna châta taopa na châ (Is. 43:7).

Pachâ pahmaoh awpa:

1. Kao 1:16 liata "ato ano taopa châ ta, ano châta taopa a châ" tahpa bie tawhta "nâ he ahy tlai ma na châ?" tahpa na pahnona dâh duah reih tua.
2. 'Nâma châta achhuahna he Khazohpa ta a rao chiehpa a châpa vâta, nâ ta achhuahna hropa kho â tlyh thei va chi" tahpa he nâ pyna dâh a châ ma?
3. Ngiapâna he "keimo liata supipa" taona ma, "Khazohpa liata supipa" taona ma? Nâ pyhna dâh duah rei tua teh.



BO – 3

A PIH PATHLEIPA CHÂ MA PI

ABeipa cha taotuhpa, na nô chhi tawhta
cha paduapa, nâmo cha baotuhpa nata
mohôhtuhpa a châ (Is. 44:2).

Nôvah thokhazy cha ama hnei tua no ta, hawti hnei mah lei awpa ama khoHPa vâta nawh pakhâna (pahlana) thohna ama hmâh tyh. Patlana moleina vâta chanô thokha cha nawh paih lei awpa ta thohna hmâh taraw ei ta, vâhneina kyh tlyma, vâduana kyh tlyma nawh vaw paih ta, riasaw ama vaw phaoh thlâh haw. Cha hawhpa hawtizy cha khizaw liata a vaw pih pathleipa ama châ aw ma?

Nô chhi liata nawh paihpa ta husona eima hnei hlâta, Khazohpa palôh liata husona hnei awpa ta rao chhieliepa eima châ. Khizaw liata vaw pih awpa ta kho eima tlypa vâta châ vei. Vâduana nata vâhneina kyh vâta châ hra vei. Khazohpa ta keimo châta hmo â chhuahpa patlohna tiao a châ (Hla 138:8). Eima chipho, vo, sâ nata hmisâ zydua chhao he, Khazohpa palôh khopa hawhta taopa a châ. Eima khoHPa vâta mongyuhpa châ thei hlei aw

ma pi. Chyhsa hropa nata ânanona eihpa ta taopa châ pi ta, cha kyh liata khotly awpa hnei mah pi. Abei Davi ta “Nâ, Khazohpa tlai ta ei pathipalôh hnei chi ta, ei nô py chhôn liata na khu chi ta, ... a ru lâta taopa ta ei y no ta, alei su ry chaipa liata â ngia ngaitapa ta na tao chi ta, ei rureihpa cha nâ tawhta nyupa ta a y vei (Hla. 139:15) a tah hra.

Khazohpa ta a chhâ hneipa miah a tao. Eima pina noh nata su zy, hro noh zie nata pahrâna nawpa su zy, thi nawpa noh, dâh nata su taihta Khazohpa ta a rao chiehpa a châ. Chyhsa hmohmô liata riasaw châ ngyu aw pi ta, Khazohpa hmiakô liata deikua riasaw châ ma pi. Khazohpa achhuahna pi patlohsa awpa nata a rônahna châta taopa eima châ.

Khazohpa ta khapa vâta chyhsa a tao? Khazohpa cha Kyhpachâna a châpa vâta, a kyhpachâna palâsa awpa châta a châ. Khazohpa ta leilô he ano chyhsazy pahrâ n’awpa su châta a tao (Is. 45:18). Chyhsapa cha nô py chhôn tawhta Khazohpa ta â pyhpa, chhi tawhta a pipa, machâpa ta sâpawhna taihta a mohôhpa eima châ (Is. 46:3-4). Khazohpa ta chyhsa to hnoh ta a ngiachhiena liata ânanona eihpa ta miah a taona chhâpa cha, âchhuahna pi patlohsa awpa châta a châ. Chavâta chyhsa he khizaw liata a vaw pih pathleipa châ ma pi.

Pachâ pahmaoh awpa:

1. Chyhsa to he Khazohpa achhuahna pi patlohsa awpa taopa châ taraw pi ta, pakha nata pakha eima lyu leina, eima nanona eihpa eima hnei chyu, tahpa na pyh ma?
2. Riasawzy he, apatlana nata apheina moleina vâta a pihpa hawhta pachâpa a châ tyh. Âmozy he a vaw pih pathleipa châ thlâh ha va ei ma? Khazohpa hmiakô liata mohropa nata ama nanona a y rai ma?
3. Khizaw liata a pih pathleipa ei châ leipa khiah, kheihawhpa kao liata e Khazohpa achhuahna pi eima patlohsa thei hra aw. Reipahmaoh tua suh vy.



Bo – 4

NA HRONA HE A HY E A HAQH?

Hriapasana nata raihria liata zôthaina zydua chhao he, vaihzy uahvâna vâta a vaw ypa a châ tahpa ei hmô (Biechhotuhpa 4:4).

Chyhhsapa hrona he hmo sâkha kha ta a haoh lymâ. Alyna ta a haoh no ta, na tha pha kaw aw ta; pachârôhna, ngiarohna, china nata alôh leina zy ta eima hrona a haoh no ta cha, y molo thei leina taihta riethei eima tao tyh. Chyhsa hrona miah a haoh tyhpa hluhpi a y; thokha cha phana lâta miah chhi ta, thokha deikua cha sapa nata thlahpa raona lâta miah a chhih. Chyhhsapa hrona a haoh tyhpa hmo sâ (5) eima pachâ tua aw.

1. Chyhsa thokha hrona cha hmo paraona ta a haoh.

Khizaw liata hmo a parao beih leipa chyhsa y vei ei. Châhrasala, chyhsa hluhpi cha kha hlâta hmo paraonazy, a ru lâta taopa moleina khâ nyupa zy, moleina vâta nozapa nata maophyuhpa ta y awpa ta china thlahpa ta hrona a haoh tyh. Kaina ta `nâ hmôpa maih ta eina thie thlâh bâ aw ei' (At. 4:14)

tahpa ta, a chihuhpa hawhta eima y thlâh haw. Khazohpa ta cha hawhta hmo paraona ta hrona a haohpazy hnohta khotalaina pie awpa â chhuah. 'A hmo paraopazy a ngiahthaipa ta y ta, a moleina khupa ta a ypa cha a nohlao na... ABeipa ta hmoparaona a hnei leipa ta a pachâ hawpa vâta' (Hla 32:1). Khazohpa ta a chyhsazy cha angiathaina ta miah a padua tyh.

2. Thokhazy hrona cha angiapachhina nata hiehâhna ta a haoh.

Chyhsa thokha cha hiehâhna zy, viari thô ta puhla khohnazy, riethei miah pataosatuhpa taolana zy, my awpa a chhuah leipa pi ta, tlao eima pachô tyh. Cha chata eima hrona rie thata miah a pathei. Eima chô liata hmo paraotuhpa ta ama my hawpa tlai kha, keimo cha khâ eima pachô thlâh hapa vâta, hmiahaona nata hiehâhna ta keimosasyh hro eima parao lymâ. Khazohpa bie ta, hiehâhna zy, riuchhônâ zy, hiatlaina zy heta chyhsapa a thie tyh (Zb. 5:2), a tah. Keimosasyh â thiepa tlâ eima châ aw.

3. Thokha hrona cha china ta a haoh.

Chyhsa thokha cha kha hlâta hmo rarôh ypa eima tyhpa vâta china thlahpa ta hrona eima pahaohsa tyh. Râh chhôn adyuhna vâta thokha cha o nata lyu siesaipa ta hro pabohsa awpa ta su hropa lâta eima râ. Thokha cha chi awpa nata chi lei awpa pathlua

thai khao leipa ta, china thlahpa ta eima bie thlâh haw. China he sasyh lôo âpatâhna a châ. China ta a haohpa chyhsazy patlâhna thohna pha chaipa cha Kyhpachana ta mohôhna a châ.

Kyhpachana chata china a chadai tyh. Chavâta china a hneipazy hnohta Khazohpa kyhpachâna a padisa awpa a cha (I Zhn. 4:18).

4. Chyhsa thokha cha khizaw hmo tlaichhaina ta a haoh.

Chyhsa thokhazy ta hneirôhna, bieheina nata rônahna ama tlaichhai tyh. Eima hnei tlu via khiah, lyna âki via awpa hawhta ama pachâ. Hro chhôn khihsatôhtuna liata adôkhâ awpa âbyuh. Châhrasala cha hawhta pachâna ta eima hrona a haoh khiahta cha, leidiana miah a tlôkhei aw. Khazohpa khohta a taotuhpa deita ta chhâzaw ta ama y aw" (I Zhn. 2:15-17).

5. Chyhsa thokha cha khokheina beiseihna heta ama hrona a haoh.

Chyhsa thokhazy cha ama hmotaopa liata â lôh vei ei. Ama hmotaopazy pa-ikhei awpa ta, mohropa khokheina nata apykheina ama beiseih tyh. Pawla ta `chyhsa palysa awpa ta a chhuah sala, Krista sei châ aw va na' tah ta; Bei Zisu ta `ahyhma abei pano chakao pabaoh thei aw vei ei" (Mt. 6:24) a tah hra. Khazohpa achhuahna ta eima hrona a haoh ha khiahta cha, palôh â ly tyh.

Pachâ pahmaoh awpa:

1. Nâma hrona he khapa tlai hema a haoh ngâpa ta na pahno?
2. Biechhotuhpa ta `hriapasana nata raihria liata zôthaina zydua he, uahvâna vâta a vaw ypa a châ' a tahpa liata `uahvâna' he `achhua hneina he hmotaotheina a châ' tahna a châ ma?
3. Râh chhôn adyuhna daihti liata `haihipa nata biedo leipa' zawpi lâta tlâhzawh tyhpazy hrona he khapa e a haoh ngapa ta na pangiasa?



Bo – 5

KHAZOHPA HMÔNA HAWHTA CHYHSA HRONA HMÔ AWP

Mylâ khâpa hmo ma a y aw tahpa pahno tlôh ei chi va. Nama hrona cha khapa ma a châ? Tihu buakha a vaw lâ ta, a lei heihpa hawh dei ma nama châ tâh (Zamie 4:14).

Hrona he a châna hawhta hmô thai leipa pi ta, eima châna hawhta tlao eima hmô tyh. Hrona eima hmôpa hawhta keimo chhao eima châ lymâ hra aw. Hrona he khapa e na palyusa? Zami ta hrona he tihu buakha a vaw lâ ta a lei thlâh ha heihpa hawhta a châ (Zami 4:14) a tah. Hrona cha arâpasuana hawhta eima hmô khiahta cha, chatliechakôh awpa awpa eima chhuah aw; adyuhna hawhta eima hmô khiah, pahniena eima cha dai aw; palypalihsana hawhta eima hmô khiah, kychhina hawhta eima hrokhei aw; vâdua thaina kao lâ tawhta eima moh khiah, pachârôhpa ta eima y aw.

Khazohpa achhuahna pi patlohsa awpa kao lâ tawhta hrona he eima moh khiahta cha he khizaw ryhpa hawhta y leipa ta, Khazohpa khonazie, a pha

a tahnazie, ano palysapazie ta eima pathipalôh pathiehpâ ta eima panano awpa a châ (Rm. 12:2). Khazohpa hmôna kao tawhta hrona cha eima moh khihta cha, he bieparupazy eima pahno thai aw.

1. Hrona cha pasiana a châ.

Khazohpa ta a chyhsazy hrozie, ngiapâna, reingiana, kyhpachâna nata ngâchhihna zy pahno awpa ta miah pasia tyh. Pasiana cha reipasaona, pathaihsana nata tiamana tahpa hawhrawh hmâpa ta chhopasiapa a châ (Zami 1:2-4, 12). Abraha cha a sawchapaw hlâpa awpa, Zakaw cha Rakheli a hnei thei n'awpa ta kô (7) chhoh chakaona ta, ama ngiapâna nata kyhpachâna pasiapa ama châ. Thokha cha pasiana liata tloh vei ei. Ada nata Evâ cha Idâh sadô liata pasiana liata tloh vei ei; Davi chhao cha ei hluhpi Khazohpa tawhta pasiana â tyh ta, tloh hra vei. Cha hawhna chata Zawsy zy, Ruthi zy, Esthy nata Daniel zy chhao ama ngiapâna pasiapa ta ama y hra. Keimo chhao kao nanopa liata ei hluhpi pasiapa ta eima y. Eima pahnie no y ta, eima pahnie lei no a y hra. Hlaotlohna liata zy, pasa taona nata thina liata zy, riethei rairuna nata tâh leina liata zy, hnabeidyhna liata zy pasiapa ta eima y tyh. Pasiana pahnie awpa he Khazohpa âchhuahpa a châ. Pahnie thei leipa reipasaona eima tyh awpa Khazohpa ta pasaih vei (Rm. 10:13).

2. Hrona cha rai pavaosa a châ.

Khizaw nata a chhôn liata hmo a ypa zydua Khazohpa eih a châ (Hla. 24:1). Cha zydua cha mohôn awpa ta Khazohpa ta chyhsapa hnoh ta a pavaosa. Keimo eih sâkha hmâh y vei; Khazohpa ta a hmobaoh (property) miah a pavaosapa a châ. Khazohpa ta Ada nata Evâ siepahliepa ta chyhsa zydua hnohta mohôhna miah a pie (At. 1:28). Sôh nata piah, hneina nata rôhna zydua he Khazohpa ta mohôn awpa ta miah a pavaosapa a châ. Rai a pie leipa chhao, ano rei tlâ a châ. Chyhsa ngâchhihpa hnoh ta a hluhpi pavaosa ta, ngâchhih leipa hnoh ta achyhta a pavaosa. Cha chhao cha ano ta miah pasiana a châ.

3. Hrona cha buakha chhôn rai piena a châ.

Chyhsa hrona he a pachhoh kaw. Abei Davi ta 'hrona he pazah tiepa, nohpahlipa nata hu hawh deita a châ', tah ta (Hlazy 39:5-6), Zawba ta 'azahiapa chyhsapa' hawhta a reih (Zb. 8:9). Chyhsa cha khizaw liata khichhaipa nata khih a tlyhpa deita eima châpa vâta rei leipa liata chhâzaw o lâ eima kua heih aw. Keimo cha avâ chyhsa châna a hneipa (Philip 3:20) châ pi ta, khizaw lâta buakha châta ta tuapa Krista lyuchâpazy (2Kaw 5:18) eima châ. Ti liata y awpa ta taopa nga cha tlâh liata hroh thai leipa aw ta, pahmôhpi cha a zaw awpa na pakhâ khih a rie a thei kaw aw. Chahawhranachata

ngiapâtu hpa cha alei hmozy liata hnabeiseihna pachhôn beih leipa aw ta, chô lâ hmozy liata tlaô â ly tyh aw. He khizaw he eima chhâzaw o châ leipa vâta.

Pachâ pahmaoh awpa:

1. Kha hlâta na hrona he kheihawhta na vaw hmô tyh? Khazohpa hmônazie hawhta hrona hmô awpa pachuna heta na hrona kheihawhta a cha hria?
2. Khapa va e, Khazohpa ta nâ nata kei ku liata hmo hluhpi miah a pavaosa vei?
3. “He khizaw he ei chhâzaw o châ vei” tahpa na pahnona heta kheita hro awpa ta a cha pachu?



Bo – 6

A TO YNA CHHÂPA - KHAZOHPA RÔNAHNA

Hmo to zydua he ano (Khazohpa) tawhta, ano vâta, ano châta a vaw ypa a châ (Rm. 11:36). ABeipa ta hmo zydua he achhâ hnei chyupa ta a tao (Bieso 16:4).

Khizaw nata avâ liata hmo a ypa zydua he anosasy ta a vaw ypa châ vei. Taotuhpa achhuahna pipatloh awpa ta taopa a châ. Chavâta ato zydua he achhâ hneipa taopa a châzie a ry liata palâsapa hawhta eima chu tua aw.

1. Khazohpa ta alei nata avâ liata hmo zydua he ano rônahna châta a tao.

Khazohpa Rônahna cha khapa e a châ? Khazohpa a châna tlaipa he a rônahna cha a châ. Khazohpa châna liahmaripa cha hmotaotheina, ypâna, ngiachhie-kyhpachâ nata phana zydua he, a rônahna thlaraw khaipaliena a châ. Avâ khita Khazohpa rônahzie pahnosa ei ta, a ruapa kawh ngaitapa khita, a ku zôthaina a palâsa (Hlazy 19:1-2). Chavâta Khazohpa rônahna cha a hmotaopazy tawhta hmô theipa nata pahno theipa a châ.

Khazohpa ta a rônahna palâsa awpa ta châna nanopazy ta a chyhsazy hnohta kao hluhpi ta â phuah. Idâh sadô liata Adâh nata Evâ hnohta zy, Mawsi hnohta zy, râhpathohpa liata achhyna byureih liata zy, Zisu Krista nata Awnanopa liata zy, a rônahna a phuah. A rônahna cha achâhta kâhmâhpa mei hawhta zy, meihdo nata meitôh hawhta zy, meikhuh hawhta zy, tôhkalôh âthuapa hawhta zy, khaihna hawhta zy a palâsa. "Cha khihpi cha pakhaihsa awpa ta noh abyuh leipa ta thlâpâ chhao abyuh hra vei; Khazohpa rônahna chata tloa a pakhaihsa" (Biph. 21:23).

2. Khazohpa rônahna cha Zisu Krista liata a lâ.

Zisu Krista cha Khazohpa rônahna pahmôsa awpa ta khizaw lâta â zupa a châ. Sawchapawpa (Zisu) liata Khazohpa rônahna pakhaihsapa a châ (Heb.1:3). Bie cha chyhsapa lâta a vaw lie ta, ngiachhiena nata rônahna biepa ta eima hry liata a pahrâ. Chavâta a rônahna cha Zisu liata eima hmô haw (Zhn. 1:14). Bie liata hrona y ta, cha hrona cha eima khaihna a châ. Chavâta Khazohpa rônahzie Zisu hmia tawhta pahnop a châ (Zhn 1:4; 2 Kaw. 4:6).

Kyhpachâ Zawhana ta cha kyh cha he hawhta a palâsa. "Nâ, eima Beipa nata eima Khazohpa, rônahna zy, palyupalihna zy, hmotaotheinazy cha a to tlâh na châ na; nâma ta ato zydua tao chi ta, na khopa vâta a ypa nata taopa châ tlôh hra ei ta." (Biph. 4:11).

3. Khazohpa rônahna cha kheita eima chyh-ei aw?

Hmotaopa hry liata Khazohpa a parôhnasa khoh leipazy cha vâlyuchâ a pao hawpazy (ahripazy) ama châ. Apalaina he Khazohpa adyuhna moleina a châ. Chyhsa to molei khai haw ei ta, Khazohpa rônahna to thei khao ma (Rm. 3:23). Châhrasala Paw Khazohpa ngiachhie-kyhpachâna chata a Sawchapawpa Zisu Krista liana chata sawchâna miah a pie. Khazohpa ta "ei chyhsa a châ beih leipa cha ei chyhsa ei tah aw; nâmo cha ei moh a phaoHPa, ei rônahna châta ei taopa nama châpa vâta ei paduapazy nama châ, a tah (Isai 43:7).

Chavâta chyhsa ta Khazohpa rônahna hmiasieh awpa, palyupalih awpa, phuah awpa, reithai awpa nata alaichadai lymâ ta hrokhei awpa a châ.

4. Khazohpa cha kheita eima parônahsa thei aw?

Zisu ta Khazohpa âchhuhpa taopa ta a parônahsa. "Nâma ta hmo tao awpa eina piepa chi kha, tao khai na ta, khizaw liata ei cha parônahsa haw" (Zhn. 17:4). Keimo ta Khazohpa eima parônahsa theina kao hluhpi a ypa hry ta, eima hrona châta âchhuhpa saipazihpa ta kao (5) deita eima palâsa aw.

1) **Khazohpa achhyna:**

Khazohpa cha Thlahpa châ ta, âchhyutuhpazy ta thlahpa nata hmeiseihpa ta ama chhy awpa a châ (Zhn. 4:24). Khazohpa palya ta a Bie hawhta hrona, reithaina, palyupalihna, a kyhpachâ-ngiachhiena phuahna ta ano eima chhy awpa a châ.

2) **Ngiapâtuhpazy nata Akaona:**

Akaona he mohropazy hnohta kyhpachâna palâsana a châ. Krista ta miah âlypa hawh, keimo chhao mohropa eima lyna he akaona a châ.

3) **Zisu Krista lyuna (zituha pitlohna):**

Krista lyuna cha Bie hmeiseihpa hawhta tao ta, seinâ hnei leipa ta hrona a châ. Zituha ngâchhihpa nata hmâtâlâhpa eima châ thei nawpa ta Khazohpa bie hmâpa ta pachuna he ano lyuna a châ.

4) **Chyhsazy Deichhy Chakaona:**

Khihtlâh nata Awanopa hry liata chiehleipa zy, baongiapazy nata mopathaih penawh phahlana liata pazaona raihriana he chakaona a châ.

5) **Khazohpa Thâtihpa phuahna:**

Awanopa ta ngiachhie ta pachha châna kyh he chyhsa to hnohta phuahpa ta, ngiapâna palâhâhna awpa ta biepiepa eima châpa hawhta Thâtihpa phuah lymâ awpa a châ.

Pachê pahmaoh awpazy:

1. Khazohpa rônahna he kheihawhta na no â vâh? A rônahna âlâna kao (2) reih tua.
2. Biehraï parohpa liata Khazohpa ta a rônahna cha kheihawhta a palâsa tyh?
3. Chyhsapa ta Khazohpa eima parônahsa awpa mia (5)zy reih teh?



BO – 7

KHAZOHPA ACHHYNA YZIE

Khazohpa cha Thlahpa châ ta, âchhytuhpazy
ta Thlahpa nata hmeiseihpa ta
ama chhy awpa a châ (Zawhana 4:24).

Khazohpa ta chyhsapa cha ano palya awpa ta a tao. Ano ngiachhiena, kyhpachâna nata rônahna zy reithai ta palyupalih awpa he akhona nata âlynazie a châ (Eph. 1:5). Khazohpa chhao he chyhsa hawhta palôh apielyuna (emotions) a hneipa a châ. Chavâta kyhpachâ, thapha, palôhtlâh, pahneih, hiehâh, nôpo, pachârôh, ngiachhie thaipa a châ hra. Chyhsa hrona chhâ cha Khazohpa palya awpa vâta, Khazohpa a palyasapa achhyina kyh eima chu aw.

1. Achhyina (worship) yzie

Achhyina cha Khazohpa tlâh a châna Ano lâta piena a châ. Achhyina liamaripa nata â nua chaipa cha Khazohpa a châ. Achhyina cha ano kyhpachâna nata âphuahna chyh-eina chhao a châ. Eima ngiahpa

Ano lâta tlôkheina tlyma, eima ngiapâna tha patlôna châta dei taopa châ vei. Khazohpa cha achhy tlâh a châpa vâta reithai, palyupalih ta, a rônahna

patosana awpa he eima chhyna chhâ nata liahmaripa a châ. Ngiachhiena vâta pachha eima châna, Khazohpa châna tawhta a hmotaopazy vâta chyhsa ta Ano eima chyh-eina cha achhyna tahpa a châ.

2. Achhyna cha Khazohpa palysana a châ.

ABeipa cha ano chituhpa (achhytuhpa) nata ano liata ngâna pahniehtuhpazy chô liata â ly tyh (Hlazy 147:11). Achhyna cha thlahpa liata husona nata pati niepa hawhta a châ. Khazohpa cha hmeiseihta ta ano âchhytuhpa a tlua (Zhn. 4:23). Thokhazy ta achhyna cha hlasana, thlahchhâna, sermon reina nata thyunazy taopa hawhta deita ama pachâ. Chazy deita châ vei; A bie hrokhei ta, Ano palysana tiao a châ hri.

3. Achhyna cha Khazohpa lâta tlokhuh ahlâna a châ.

Achhyna he apakhy chhôn liata taopa ngâlâh châ vei; hro chhôn ta khâ tao pazao lymâpa ta ABeipa hmia cha khâ tlua lymâ awpa a châ. Chhâzaw ta my tawhta zâ a châna taihta reithai awpa, khatino rai ta reithai ta achhy awpa a châ (Hlazy 34:1; 105:4; 113:3-4). Khazohpa cha pathipalôn tlokhuh, palôn tlokhuh, thatlôna tlokhuh ta, thlahpa nata hmeiseihna tlokhuh ta achhy awpa a châ (Rc. 6:5; Zhn 4:24).

4. Achhyna cha kyhpachâna palâsana a châ.

Kyh eima pachâpa chyhsa cha palysa awpa eima chhuah tyh. Kyhpachâpâ chô liata hmo taopa zydua cha phaohripa hawhta pachâ tlâ leipa pi ta, aly kawpa ta eima tao. Hmo eima taopa maih cha, chyhsa chôta taopa hawhta pachâ leipa ta, Khazohpa châta taopa hawhta tlao pachâ awpa a châ (Kao. 3:23). Pawla ta, `nama niepa rai ta, nama dopa rai ta, nama taopa maih Khazohpa rônahna châta tao teh u (I Kaw. 10:31), a tah hra. Zisu nata Lazaru ama viasapa hawhta achhyna dopa cha Khazohpa nata chyhsa viasana chhao a châ.

Pachâ pahmaoh awpa

1. Achhyna yzie na novâhnazie hawhta duah reih tua?
2. Mara Awnanopa ta Khazohpa eima chhyna heta Khazohpa â ly tlai aw ma? Na pachâsa khopa duah reih tua?
3. Apakhy ta achhyna liata, ahy chakaona e peimawh chaipa hawhta na pahno?



BO – 8

ACHHYNA LIAHMARIPA – AHLÂNA

Nama pôhpa pachiahpazy cha, sia leina chhaichhi châta moleina lâta hlâ leipa u la, thina tawhta hrona lâ chhihthapazy nama châpa hawhta, Khazohpa lâta a hlâ teh u (Rm. 6:13).

Khizaw ta a khoh chaipa cha “pahniepâ” châ leipa ta “pahnietuhpa” châ awpa he a châ. Adyuhna liata `ei na pahnie haw chi, ei nawh haw’ tahpa chariahpa ku liata athytlupa cha a *surrender* haw, anawhrai haw, eima tah tyh.

Khazohpa lâta athytluna, apanawhna nata tlokhuh ahlâna deikua cha riahchhiepazy taozie hawhpa châ vei. Khazohpa lâta ahniana a châpa vâta Krista pheisaih riahphapazy taozie tlaô a châ. Achhyna dopa cha Khazohpa lâta “âpanawhpa ta ahlâna (*surrender*)” a châ. Chahawhta ahlâna cha riahchhiena vâta châ leipa ta “Kyh miah pachâ tuapa kyhpachâ hrina” tlaô a châ (I Zhn. 4:19).

Pawla ta achhyna hmeiseihpa yzie he hawhta a chhopasia. “Khazohpa ngiachhiena vâta atheihna hrohpa nata pathaihpa nata a pyh tlâh châ awpa ta, nama pôhpa cha Khazohpa lâta hlâ awpa ta ei cha haw ei. Cha cha thlahpa ta Khazohpa namâ

chhynazie awpa a châ. He khizaw ryhpa hawhta y leipa u la, nama palôh pathiehpa ta tlaô anano lymâ teh u. Chatanachata Khazohpa khopa cha khâpa ma a châ tahpa pahno thei aw ei chi ta, hmo phapa a pyh tâhpa nata phapakipa cha nama pahno thei aw (Rm. 12:1-2).

Achhyna dona nata hmeiseihpa cha Khazohpa lâ apanawhpa ta tlokhuh ahlâ ta Khazohpa palysana he a châ. 'Ahlâna' tahpa cha Zisu Krista Beipa ta apyna, ano châta/lâta âpananona, Kraws apiana, moleina liata sasyh thina zy â hlao. Cha hawhta eima hlâna awpa liata mia pakhâtuahpa hmo sâ (3) a y – china, apalaina nata noraihazy a châ. Chavâta Khazohpa lâta tlokhuh eima hlâ thei nawpa ta pahno awpa âbyuhpa mia (2) eima chu aw.

1. Khazohpa liata ngâna pahnieh awpa.

Khazohpa cha ato theipa nata kyhpachâna ahneipa a châ tahpa a pahnopazy deita ta, Ano liata ngâna ama pahnieh tyh. Ano châna pahno tua leipa ta a pahnieh awpa a ru kaw. Hneirôh kaw tlôhta, kyhpachâna a hnei leipazy chô liata ahy hmâh a pahnieh khoh vei ei. Khazohpa cha hmotao ataokheipa hawhta kyhpachâna chhao a hnei. Ano cha chyhsa to pachha awpa a khohta vâta

hriapasapa nata phaohripazy cha a hnohta ama pangai tyh (Mt. 11:28). Abeip Davi ta "keimo la arâ nata talailizy a palaikhei ma pi, Jehôvah Khazohpa Moh tlaô eima palaikhei (Hla 20:7); Kei la, na pahaopa Jehovah Khazohpa moh ta tlaô ei vaw

pua” tahpa ta Kôliatha a sie hnao (I Sm.17:45). ABeipa a heiksaipa ta, chyhsapa ngâhchhâpa cha chhiesapa ta y aw ta, ABeipa a ngâtuha deikua cha a noh a hlao aw (Zer. 17:5,7). Chavâta ABeipa cha ngâ ta, hmo phapa tao awpa a châ. ABeipa liata khâ âlyna cha palôh khonazy hmôna a châ (Hla 37:3-5).

2. Sasyh tloh leipa palâhâh ta ano hnohta athythlu awpa:

Chyhsa hluhpi ta Khazohpa lâta eima pahnieh ngâh leina chhâ cha, tloh leinazy (chieh leina) eima palâhâh ngâh leina vâta a châ. Eima hrona liata Khazohpa hlâta keimo biehei via awpa tiao eima khoh. Bei Zisu hawhta “Keima rei châ leipa ta, nâma rei sai tiao châ mawh sy” tah khoh ma pi. Davi cha ano thatlôna a palaikheipa ta maluh a reih. Khazohpa palôh tlâh vei. Khazohpa ta Izarei phopi chô liata hriena pho (3) a vaw patlôsa awpa kyh liata Davi cha kho patlysa no ta, “ei nôpo ngaita. ABeipa ku liata ei thythlu aw, ano cha zawngiah thei ngaitapa châ tlôh ta” (I Tr. 21:13) a tah. Khazohpa ta a hnohta âhlâpazy a hmâh tyh. Mari cha vâlyuhchâpa bie ângiahpa vâta Zisu nô a vaw châ. Khazohpa liata a ngiaripha ta, ahripa cha eima dyuh khiah, miah a râsai aw (Zami 4:7).

Pachâ pahmaoh awpa:

1. C.S. Lewis ta “apalaina he thlahpa liata cancer pasana a châ” tah ta, Khazohpa eima ngâhpachhâ thei leipa he, eima palaina vâ châ thlâh ha vei ma?
2. Tlokhuh ahlâna he Khazohpa achhyna liahmaripa a châ khiah, khapa vâta e, ‘hmeiseihtha ta Khazohpa eima chhy thei vei?
3. ‘Khazohpa liata ngâna pahniehna’ na nôvâhna dâh duah rei tua?



BO – 9

KHAZOHPA NATA AVIASANA

ABeipa aviasana cha ano a chituhpazy châta châ ta, a biehraï a pahnosâ tyh ei (Hla 25:14).

Khazohpa ta a viasa châ awpa ta miah a khoh. Aviasana cha Khazohpa nata azaona kyh reina a châ. Khazohpa cha eima hnohta Taotuhpa, Beipa, Pachiatuhpa, Chatlaituhpa, Pachhatuhpa nata Paw tahpa ta moh hluhpi ta â luah thei aw. Cha zy hry liata palôh miah hria viapa cha "Khazohpa ta a cha viasa khoh" tahpa hih!

Idâh sadô liata Khazohpa nata chyhsa azaona a pha kaw. Âdâh nata Evâ cha Khazohpa viasa pha chaipazy hawhta ama kao. Amâ ly kaw. Biehraï liata Khazohpa viasa phapa chyhsa ama chyh kaw. Mawsi nata Abaraha cha Khazohpa viasazy ama châ (Pua. 33:11; 2 Tr. 20:7; Isai 41:8; Zami 2:23). Davi cha Khazohpa palôh a phaohpa (Hmt. 13:22) tahpa a châ. Zawba, Enawka nata Nôah zy chhao Khazohpa viasa ama châ (Zb. 29:4; At. 5:22; 6:8).

Biehraï Parohpa daihti liata theihthai beichaipa nata mo chyhtapazy ta Khazohpa ama viasa thei. Zisu ta

Khazohpa nata chyhsa a viasa theina lâthlôh a vaw tao. Cha cha Zisu Krista ngiachhiena nata kraws liata âhlana vâta a vaw ypa a châ (2 Kaw. 5:18-20). Zisu Krista zawzi ta Paw nata Sawchapawpa nata Thlahpa Pathaihpa viasa hawhta akao theina eima hnei haw. Zisu ta sei cha tah khao aw veina, viasa tlaô ei chata bâ aw ei (Zhn. 15:14) a tah.

Hla phietuhpa mochaonô Fanny Crosby ta Zisu cha a viasa hawh tlai ta a pahnopasiapa vâta "Zisu eima viasa pha chai, pachârôh nôpona siekhei" tahpa hlâ a vaw phi haw. Khazohpa viasa phapa châ pazao lymâ thei nawpa âbyuhpa eima chu aw.

1. Khazohpa nata bie achho lymâ awpa:

Hâtâ eikha ta eikha deita apakhy thlâh hapa heta Khazohpa nata aviasana palaiseihsa thei khao vei. Viasana châna liata lôh ârie viana cha a lyna nata ngiarohna achho raihrie theina nata thlah eima chhâna he a châ. Khâ aly ta, bâh leipa ta thlahchhâna he (I Thes. 5:17) ngiapâna liata eima husona a châ. Thlah a pasie pi chhâ cheingei awpa tahna châ vei; Khazohpa miah ypâna, ano leipa ta eima y thei leina palâsana he tlaô apeimawh.

2. Khazohpa Bie chhô nah zâ pachâ awpa:

Khazohpa nata a viasa ta, azaona phapa tao lymâ awpa ta cha a Bie pathaihpa chhôn nah zâ pachâ awpa âbyuh. Cha hawhpa chyhsa âlyna cha ABeipa

ryhpa liata châ ta, a ryhpa bie cha chhôn nah zâ ta a pachâ tyh (Hla 1:2). Khazohpa bie eima pahno vei khiah, ano nata akao thei aw ma pi. Khazohpa ta Samuela hnohta a bie a phuah tyhpa vâta Isamuel ta Khazohpa cha â kao thei tyh (I Sam. 3:21). Zawba nata Davi ta Khazohpa khâ ama hnia theina cha a Bie ama pasôpa vâta a châ. Zawba ta, 'A hmao biepiepa tleisai leipa na ta, a pakah biezy ei noh to pati hlâta ei pasô via' (Zb. 23:12) a tah. Davi ta, 'Na ryhpa bie cha ei pasô kaw dia! Noh y ta ei pachâ tyh (Hla 119:97); Na raihria zydua pachâ aw na ta, na hmotao thatlôpazy ei laichadai aw (Hla 77:12) a tah. Viasa hmeiseihpazy cha ama likah nyupa y leipa ta bierupazy taih ama chho tyh.

Pachâ pahmaoh awpa:

1. Fanny Crosby hla taopa "Zisu eima viasa pha chaipa" tahpa hla tawhta Khazohpa nata aviasana peimawhzie duah reipahmaoh tua?
2. Viasa châna pahro lymâ thei nawpa ta peimawhpazy reih la, nâ ngiapâna nata duah pakao tua rai?
3. Abaraha zy, Zawba zy, Enawka zy heta khapa vâta e Khazohpa ama viasa thei?



BO – 10

KHAZOHPA PALYSAPA ACHHYNA

ABeipa na Khazohpa cha na pathipalôh tlokhuh ta, na thlahpa tlokhuh ta, na pachâna tlokhuh ta nata na thatlôna tlokhuh ta kyh na pachâ awpa a châ (Maka 12:30).

Khazohpa cha chokuachobâpa ta achhy awpa châ leipa ta, hrona tlokhuh ta ano âchhy awpa a khoh. Samari chanô ta, Khazohpa achhyna daihti nata su pha chaipa nata achhyna dâh a rei no ta, Zisu ta, 'Khazohpa cha hmeiseihpa nata thlahpa ta ano â chhytuhpa tiao a tlua' (Zhn. 4:20-24) a tah. Khazohpa a palysapa achhyna miah (4) a y.

1. Thlahpa nata hmeiseihpa ta achhyna:

Chyhsapa cha chôpho ta ângialina a pachâ tyh. Khazohpa deikua cha hmeiseihpa nata thlahpa ta ano â chhytuhpa tiao a tlua (Zhn. 4:20-24).

2. Palôhru âdo kawpa ta achhyna:

Chyhsapa ta khôtho lâ liata âlâna hmisâ tlyma, pôraoh tlyma, a moh tyh; ABeipa deikua cha

palôhru tiao a moh tyh (I Sam. 16:7). Khazohpa cha pathipalôh tlokhuh, thlahpa tlokhuh, pachâna tlokhuh nata thatlôna tlokhuh ta ama chhy awpa a khoh (Mk. 12:30).

3. **Pachâna pasohpa hneipa achhyna:**

Thokha cha pachâna hmeiseihpa hnei leipa ta, palôh tha thyu thita, *Haleluia* sai ta ei (3) tlyma, ei (7) tlyma paawsapa zy, sermon-tuhpa biereipa pachâpasia leipa ta *amen, amen, amen* tahpa zy, *Abeipa cha a pha* tah tlôh pi ta, a phana rei awpa pahno lalih vâ, tahpazy he pachâ hmeiseih leipa a palâsa. Hmo to he zachhihpa nata chybia hneipa ta tao awpa a châ (I Kaw. 14:40).

He kyh liata Pawla pasyuna a pha kaw. Thlahpa ta thlahchhâ aw na ta, ei palôh chhao ta ei chhâ aw. Thlahpa ta hla sa aw na ta, ei palôh chhao ta ei sa aw... Nâ la, alyna bie na reih pha kaw ngyu ma, mohropa deikua taopathi hlei vei (I Kaw. 14:15-17).

4. **Hmotaona ahlaopa achhyna:**

Pawla ta Khazohpa achhyna yzie he hawhta a reipasias. "Nama pôhpa cha atheihna hrohpa, pathaihpa nata a pyh tlâh châ awpa ta nama hlâ awpa a châ (Rawma 12:1-3). A mâ pie leipa ta Khazohpa achhy thaipa châ vei. Abei Davi ta, 'khapahmâh a pahryuh leipa ta ei Khazohpa lâta raopa hlânazy hlâ chachei ta aw va na (2 Sam.

24:24) a tahpa hawhta, keimo chhao khapa tlyma eima pahryuh awpa a châ. Hmotaopa ahlaio leipa ngiapâna a thipa a châ tahpa châ tlôh ta (Zami 2:26).

Pachâ pahmaoh awpa:

1. Zawpi ta hmaohkha achhyna hema Khazohpa palysa via aw, mopakha thlahchhâ ta achhyna ma? Khapa vâta e?
2. Eima local liata Khazohpa eima chhyna he na palôh a tlâkhei thei ma?
3. A mâ piepa ta Khazohpa achhyna yzie na novâhna dâh duah rei tua?



BO – 11

KHAZOHPA NATA EIMA HLA KAWNA

A chyhsazy tawhta a hmia a nyu hapa ABeipa cha
hâ aw na ta, ei mokhâh aw (Isai 8:17).

Eima hrona liata o nata lyu, nie nata do ativypa ta, hnatlâhna pha ta, chhôhkha eima ki no ta, Khazohpa achhupa cha a pha eima tah kaw. Châhrasala riethei-rairuna, vâduana, chiehleina nata nôpona miah a vaw tlô thlu nahta, Khazohpa a hnia awpa hlâta tiao eima hla via tyh. Khazohpa cha lâhlapi liata a ypa hawhta pachâna daihti a y. Khazohpa ta miah âhnia khao leipa hawhta eima pachâ. Zaio ta, "ABeipa ta na siesai ha ta, ei Khazohpa ta eina my haw" a tah no ta, Khazohpa ta he hawhta thlah a palôh. Chanô ta a saw sâhpi a ngiehpa a my thei aw ma? Chanôzy ta la ama sawzy ama my ngyu na, kei deikua ta la cha my va na; ei kupazahzy liata nama moh cha roh ha na ta" (Isai 49:14-15) a tah. Khazohpa cha a hnia ei si la, ano chhao miah a hnia aw (Zami 4:8).

1. Khazohpa cha lâhlapi ta a ypa hawhta âtaona he miah a pasiana a châ:

Khazohpa palôh a phaohpa, Abei Davi chhao achâhta lâ Khazohpa he lâhlapi liata a ypa hawhta a pachâ. "Hy ABeipa, khazia lâhlapi liata a duah chi ta, nôpona noh liata nâ nyu tly? (Hlazy 10:1). Khazia e eina dytha chi tly? Chariahpa tlybaipa vâta khazia mâchhiesapa ta ei khie aw tly? Khazia na pathluapa ta eina hla chi tly? (Hlazy 43:2; 22:1).

Châhrasala, Khazohpa cha miah siesai vei. Mawsi ta Zasua hnohta he hawhta a reih. 'ABeipa nama hmia lâta sie aw ta, nama hnohta y aw ta, cha siesai beih leipa aw ei ta, cha pathlua beih aw vei. Chi leipa u la, a ngiaroh hra khuh vy (Rc. 31:8). ABeipa cha a mopathaihpaazy a heihsai beih leipa ta, chhâzaw ta a hrôbieh ei. ABeipa chata cha pathlua beih leipa aw ei na ta, cha siesai beih aw veih ei na, a tah (Heb. 13:5).

Zawba a ta nôpo chaina daihti liata he hawhta a paphôh. "Nochhi, notlâ, maw nata chho lâ sie na ta, Khazohpa rai hmô va na. Châhrasala, lâpi ei chhihpa pahno ta, eina pasia khai tawhta la ngôh hawhta ei vaw pua aw (Zb.23:8-10) a tah.

2. Palôh liata a ypa zydua ano lâ leihtha teh:

Zawba cha a lochona daihti liata Khazohpa nata a viasapa ta a poh o liata ama y tyh (Zb. 29:4). Khazohpa hmiakô liata a pakah pakhâ leipa ta, a pachârôhna nata palôh pasana zydua Khazohpa lâta leihthapa ta a paphôh hra (Zb. 7:11).

3. Ânano beih leipa Khazohpa lâ a heih teh:

Eima hrona liata ABeipa ta miah a siesai ngyu na, tahpa pachâna a vaw y tita, ânano beih leipa Khazohpa châna lâ mo awpa a châ. Khazopa châna tahpa cha a ato taotheipa, su to liata a ypa, ato hmôtheipa a châpa vâta a siana, phapa, kyhpachâna, ngâchhiha nata pathaihna lâta moh mah y, tagna a châ. Khazohpa chata eima hrona châta khokheina miah pie ta, miah mohôh ta eima thlahpa a pabohsa (Zb. 10:12). Ano cha a to taotheipa châ ta, hmo âchhuahpa cha khâpa hmâh pakhâ thei vei (Zb. 42:2). Ano cha lâpi ei chhihpa cha pahno ta (Zb. 23:10); keima châta a achhuahna phapa hluhpi a hnei (Zb.23:12); ano cha a hrohpa vâta noh chhâna noh liata miah â duakhei aw (Zb. 19:25).

4. Khazohpa bietaihpa ngâ la, na châta a taopazy athei thlâh ha teh.

Kheihawhpa duahmo khochhih leipa eima tyh nahta, hrona patymâsa awpa hlâta, Khazohpa ngiachhiena keimo châta âdaih pakipa cha tiao athei thlâh ha awpa a pha. `Khazohpa hmao biepiepa tleisai leipa ta, a pakah tawhta bie a puapa cha noh to pati hlâta tiao pasô via awpa a châ (Zb. 23:12). Miah a patypama hapa chhao ta, ano miah â duakhei lymâ aw, tahpa hnabeiseihna hneia awpa a châ (Zb.13:15).

`Krista zawzi ta Khazohpa siana eimâ hly thei n'awpa ta, moleina rai a hnei leipa cha, Khazohpa ta keimo vâta moleipa ta a taopa (2 Kaw 5:21) khâ athei thlâh hapa ta, Krista cha keimo châta hmo phapa hluhpi a tao via aw, tahpa beiseih lymâ awpa a châ.

Pachâ pahmaoh awpa:

1. Kheihawhpa duahmo chhiepa eima tyhpa chhao ta, `Khazohpa cha keimo miah â duakhei lymâ' tahpa he a do tlai aw ma?
2. Khazohpa miah â hnia via theina awpa ta khapa eima tao aw?
3. Chyhshapa duahmo ânano tyhpa heta Khazohpa châna a panano thei aw ma?



BO – 12

KHAZOHPA CHHÔHKHA TA TAONA

Pachâ teh u, Paw ta kyh miah pachâna cha thata a châ kaw dia! Khazohpa sawzy ta miah a bie ha hih (I Zhn. 3:1).

Ngiapâtuha zydua cha Khazohpa chhôhkha liata mebâh eima châ. Chhôhkha liata paw, nô, sawzy nata samoh/sahlazy azaona ta akaona paduapa a châpa hawhta, Krista chhôhkha cha awnanopa sahlaozy akaona ta paduapa a châ. Chhôhkha phapa ngiâna cha kyhpachâna, akaona, palyupalihna, zana, mohôhna nata laiseihna ama hneina he a châ. Nô nata pawzy ta sawzy kyhpachâna ta ama mohôhpa vâta sawzy chhao, nôpaw zapa ta ama reih ama reingiah tyh. Khazohpa chhôhkha cha akaona phapa hneina liata reingiahna a y.

Awnanopa sahlao zydua cha Khazohpa chhôhkha ama châzie pahno thei nawpa ta he hawhta eima chu aw.

1. Khazohpa saw châ theina

Khazohpa chhôhkha liata Paw, Sawchapawpa nata Thlahpa Pathaiha azaona nata akaona a y.

Ngiapâtuhpazy cha Khazohpa khozie hawhta bie hmeiseihpa liata chhôhkha mebâhzy ama châ (Zami 1:18). Ngiapâna ta Khazohpa cha Paw tahpa ta aw pi ta, keimo zydua cha a sawzy eima châ. Khazohpa chhôhkha liata daihti khô chiehpa, a y haipa nata a vaw y awpa liata ngiapâtuhpazy zydua ama hlao. Khazohpa ta chyhsa to a tao, châhrasala, chyhsa to Khazohpa saw châ khai hlei vei ei; ngiapâna ta a pihpathipazy deita saw châna thlahpa a topa ama châ (Rm. 8:15). Zisu Krista a ngiapâpa maih, Khazohpa sawzy châ theina biehneina piepa ama châ (Zhn 1:12).

2. Khazohpa chhôhkha liata apahlaona

Zisu ta, "sie u la, pho to pachupa ta tao u la, Paw nata Sawchapawpa nata Thlahpa Pathaihpah moh ta bâti pachâsa teh u," (Mr. 28:18-20) a tah. Bâti châna he, Khazohpa chhôhkha châna eima palâsana a châ. Zisu thi ta, a thyuheihpah hawhta keimo chhao moleinazy thisaipa ta hmo phapa liata eima hroh haw, tahpa pamosa nawpa ta bâti eima châ. Eima zydua ta, Zu chhao, Krika chhao, sei chhao, khotalaipa chhao pôhpa miakha châ awpa ta Thlahpa miakha ta bâti pachâsapa châ pi ta, Thlahpa miakha tawhta padosapa eima châ khai hra (I Kaw. 12:13).

3. Khazohpa chhôhkha liata yna byhnâ

Ngiapâna ta saw châna biehneina miah a piepa vâta Khazohpa cha "Abba, Ei Paw" tahpa ta eima

aw thei haw. Sawchapaw/nô eima vaw châ hawpa vâta Krista zawzi ta Khazohpa ryutotuhpa eima châ (Kal. 4:6-7). A ryu totuhpa eima châpa vâta Krista Zisu liata a hneirôhzie lymâ hawhta Khazohpa ta eima phahlana to liata miah a pazao lymâ aw (Phip. 4:19). Khizaw liata eima y chhôn ta Khazohpa hneirôhna, ngiachhie-kyhpachâna, palôhpasina, rônahna, sona, hmotaotheina nata zawngiahna, hnabeiseihna, ryuto rônahpa châna nata palôh mo pavâsana piepa eima châ (Eph. 1:7; Rm. 2:4, 9:23, 11:33; Eph. 3:16, 2:4, 1:18).

Khazohpa ryu topa liata hmo (5) a hlao. Chazy cha Khazohpa hnohta chhâzaw ta yna, Krista lyuna hro, riethei-siepasa taona tawhta pachhana, chakaona lymâ hmôna nata Krista rônahna âhlyna zy a châ (I Thes. 5:10, 4:17; I Zhn. 3:2; 2 Kaw. 3:18; Biph. 21:4; Mk. 9:41; Rm. 8:17).

Pachâ pahmaoh awpa:

1. 'Ngiapâtuha zydua Khazohpa chhônkhâ liata mebâh eima châ' tahpa he, khapa e a rei khoh?
2. Pachha châna a pahno hawpazy ta Khazohpa chhônkhâ liata mebâh eima châna, kheihawhta eima palâsa?
3. Eima Awnanopa ta bâti a pachâsapazy he, Khazohpa chhônkhâ châna ama pahno khai tahpa na pangiasa ma? Khapa vâta e?



BO – 13

CHHÔHKHA LIATA PEIMAWH CHAIPA - KYHPACHÂNA

Ngiapâna zy, hnabeiseihna zy, kyhpachâna zy he a y lymâ aw. Chazy hry liata a rônah chaipa cha KYHPACHÂNA he a châ (I Kaw. 13:13)

Chhôhkha azaokhina liata peimawh chaipa cha kyhpachâna a châ. Hrona mâ thliena chhao a châ. Khazohpa cha kyhpachâna a châpa vâta chyhsa to ano kyhpachâ awpa ta âhnawpa eima châ. Khazohpa kyh eima pachâna he vaih kyhpachâna liata a lâ. Chavâta “nâma kyh nâ pachâpa hawhta na vaih kyhpachâ teh” tahpa a châ. Kyhpachâna he ngiapâtuhpazy akaona hmeiseihpa eima hneizie palâsana a châ.

Pawla ta kyhpachâna pakheipa nata hmeiseihpa kyh I Kaw. 13 liata he hawhta a pachhopasia. Kyhpachâna a hnei leipa ta hmotaopazy he hrao leipa a cha:

1. **Reih hropa (reih theileipa)** ta bie reina, paotla, viahdawh, khohipi, khohtaw, chiamie, totâ, keyboard, sâki nata kuzy chabaihpa ta lâh ngâhra si la, kyhpachâna hnei tlôh leipa ta taona zy;

2. **Bie chhochhielie theina** thlahpa hmosai piepa hneipa ta, hmo a vaw y awpazy pahnona, chyhsa moleipazy dychakhi theina taihta pahnona hnei hra sa la, kyhpachâna a hnei tlôh leipa taopa zy;
3. **Bie nyupazy pahno theina** taihta thaisona, novâhna nata pavâhna hnei hra sa la, kyhpachâna a hnei tlôh leipa ta taopa zy;
4. **Ngiapâna hneipa** hawhta a pachâ ta, ano hawhta a sie leipa mohropa seisâna, ano pachâpa ngiapâna deita â dopa hawhta a châpa, mohropa ngiapâna thai lei a pachâsa tyhpa chyhsazy hawhta kyhpachâna hnei lei tlôh leipa ta taopa zy;
5. **Hmo piana (charity)** raihria liata moh luahlâ n'awpa ta hneipa zydua baongiahpazy piepa ta, a pôhpa chhao mei liata rao awpa ta a pie hra sa la, kyhpachâna a hnei tlôh leipa ta taona zy;

Kyhpachâna he hmotaopa ta deita thlie awpa châ leipa ta, azaona nata akaona ta thlie awpa a châ. I Kaw. 13:4-7 liata Pawla ta a palâsapa Akaona tha a patlôpa kyhpachâna cha hezy hawhta a châ.

Kyhpachâna cha dao thei ta, palôh a pasi; a nô pha ta, a nôchhie vei. Hiatlia leipa ta, anosasyh a reithaipa ta a palai vei. Ano phana deita pachâ leipa ta, hiehâh khoh hra vei. Paraopazy a thei thlâh ha vei. Sia leina liata a ly leipa ta,

bie hmeiseihpa deikua tlaô â ly tyh. Ato pasa taothei ta, ato a ngiapâ ta, ato hnabeiseih ta, ato liata riethei a tao lylia tyh.

Khazohpa chhôhkha liata a ypa eima châpa vâta kyhpachana ta pakha nata pakha akaona hnei lymâ awpa a châ. Achhâ cha:

1. Kyhpachâna a hnei leipa hrona cha hrao leipa a châpa vâta;
2. Kyhpachâna cha chhâzaw châta âdaihpa a châpa vâta;
3. Kyhpachâna he chyhsa mâ thliena a châpa vâta;
4. Kyhpachâna he daihti eima hmâna nata thliepa a châpa vâta;
5. Kyhpachâna cha atahma/atanoh ta thlai hmâh awpa a châ.

Pachâ pahmaoh awpazy:

1. Khazohpa chhôhkha liata a peimawh chaipa he khapa e a châ?
2. Kyhpachâna ma kawh via, ngiachhiena ma?
3. Awnanopa Akaona a laiseih via lymâ thei nawpa ta khapa e eima tao aw?



BO – 14

HMAOHKHA TA HRONA

Pôhpa miakha ta awpa nama châ (Kao. 3:15).
Nama phaohrizy a phaokhei raihriepa ta,
Krista ryhpa paki teh u (Kal. 6:2).

Chyhsapa he keimo deita ta a y thaipa châ ma pi. Chavâta mohropa eima ngiah. Khazohpa ta chyhsa zydua hmaohkha ta eima hroh awpa ta â khopa cha AKAONA tahpa a châ. Akaona tahpa liata sasyh apakypa kyhpachâna, hmotaopa ta chakaona, hro a piena, thapasana ta thlah palôhna, hro eichheihna nata piehlâna zy â hlao.

Zawpi lia hlâta chyhsa chyhta liata akaona phapa tao awpa ta a nao via. Chyhsa pano tlyma, pathôh tlyma, Zisu moh ta ama hmaohna maihta ama hry liata y lymâ awpa ta Zisu ta bie â taih (Mt. 18:35). Akaona hmeiseihpa cha chôpho ta bielôhawh reipa hawhta châ vei; pathipalôh hmeiseihpa ta hro âtyhpa palâhâhna, china, alôh leina, chieh-leina nata tloh leina palâhâhpa ta mohropa hnohta thlahchhâna nata baona ahaw ngâhna zy â hlao. Chôpho veihseih ta biechhona hawhpa châ vei;

chhôn lâ liata bierupa zydua nyu leipa ta phuah ngâhnazy he akaona hmeiseihpa ngiâna a châ. Khaihna liata eima y khiah deikua cha, eima kao raihrie thei aw. Keimo liata a ypa bie hmeiseihpa vâta moleinazy palâhâhpa ta reihpha eima cheih raihrie thei aw (I Zhn. 1:6-8). Akaona hmeiseihpa liata:

1. Akaona dopa cha hro ahlykheina a châ.

Chyhsazy pasataona nata alyna liata hro a hlykhei theina he Akaona vâta a ypa a châ. Akaona vâta pôhpa pachiahpazy amâ baokhâ raihrie thei tyh. Pachiahpa miakha pasa a tao tita, pachiah hropa zydua taokhei ei ta, pachiahpa miakha palyupalihpa ta a y khiah, pachiahpa zydua ta amâ lykhei tyh (IKaw. 15:25-26). Ngiapâna vâta pakha nata pakha tha ama patlô raihrie tyh.

2. Thapasana he akaona liahmaripa a châ.

Thapasana ta chyhsapa ângiahpa mia (2) a pahmôsa: Mohropa ta eima châna/ duahmo miah ama pahnokheina, nata keimo ta chyhsa hropa châna/duahmo eima pahnokhei thaina zy he a châ. Chyhsa hropa pachârôhna, riethei-rairuna nata âlyna eima pahnokheina heta akaona a tao. Rietheitaona liata taokhei, a thina nata thi hrana chhao akaona phapa a tao lymâ tyh (Philp. 3:10).

3. Akaona he zawngiahna-ngiachhiena palâsana a châ.

Akaona he moleipazy angiathaina su a châ. chyhsa pakha pachârôhna heta chyhsa hluhpi pachârôhna a tlôkhei tyh. Chavâta moleipa cha hrie awpa hlâta, a ngiahthaina ta thlâh tlaô palôh awpa a châ (2 Kaw. 2:7). Ngiahthaina leipa ta akaona y thai vei. Chyhsa pakha ta na chô liata bie peipa a tao khiakta la, na hiehâhna pachô leipa ta tlaô angiahthai teh, Abeipa ta a cha ngiahthaipa hawhta (Kao. 3:1-13). Thokhazy ta zawngiahna palâsana liata ama nainôh a sô kaw tyh; viari thô awpa lia deikua eima chatliechakoh kaw. Hiehâhna padiana thohna pha chaipa cha ngiathaina he a châ. Chavâta akaona phapa taopa vâta ngiathaina cha tao lyhlia awpa a châ.

Pachâ pahmaoh awpazy:

1. Ngiapâlâhpazy nata akaona hnei pazao lymâ thei nawpa ta khapa eima tao aw?
2. Rawma 12:14-21 bie tawhta akaona yzie chhopsia tua?
3. Akaona phapa a y leipa local liata kheihawh ta zawpi zy ama pathliethlaw tyh?



BO – 15

AKAONA THEILÂPA - ADYHNA

Unawhzy adyh ngaitapa ta ypa cha,
pha ta â ngia kaw dia!... adyhna yna liana cha
ABeipa ta byhnâ tona bie pie ta, Tlyzaw
hrona awpa cha (Hla 133:1-3).

Awnanopa ta akaona liata a y, ylei thliena miakha cha adyhna, aryhna nata apôhkhana he a châ. Adyhna yna su maih liata kotalaina y ta, chyhsa to ama thapha ta, amâ ly tyh. Khitlâh, Awnanopa nata chhôhkha liata adyryhna nata apôhkhana a y vei khiahta cha, a chhôh chyhsazy sapa nata thlahpa byhnâ to thei aw vei ei. Adyuhna he chhiesana theilâpa châ ta, adyhna deikua byhnâ tona a châ. Awnanopa liata akaona nata adyhna a peimawhzie a ry lia hawhta eima palâsa aw.

1. Zisu cha Dyhna Beipa a châ.

Alei nata avâ azaona hleidy a rao hawpa cha, Khazohpa ta Sawchapaw Zisu Krista hmâpa ta azaona a tao. Zisu vâ deita ta chyhsapa cha Khazohpa nata aryheihna eima hnei theipa a châ.

Hrohsopa Isaih reipa hawhta "eima châta a vaw pihpa hawsaih Zisu cha Dyhna Beipa ama tah" (Is. 9:6). Zisu zituhpazy cha `adyhna taotuhpa châta awpa ama châ (Mt.5:9). Zisu ta ano ngiapâtuha zydua `pôhka ama châ thei nawpa' (Zhn 17:21) Paw lâta thlah a chhâ. Zisu ta adyryhna a peimawhie a reina liata `unawh nata aryh tlôh leipa ta maihsâh liata hmo piepa hlâ awpa hlâta cha, a unawhpa nata a kei ryh tua awpa a peimawh via a tah (Mt. 5:23-24).

2. Adyhna Lyuchâpa rai chakao awpa

Pawla ta Zisu cha keimo châta adyhna lyuchâpa a châpa hawhta, keimo chhao mohropazy châta adyhna lyuchâpa eima châ awpa a châ (I Kaw. 5:18-20), a tah. Krista Awnanopa chhôn liata akaona, aryhna, adyhna nata apôhkhana peimawhie cha pôhpa miakha liata pachiahpazy nahta a pakho. Pôhpa miakha liata pachiahpa hluhpi a y. Pachiahpa zydua hluh kaw hra sala, pôhka miakha châta rai a hriapazy ama châ. Phei ta ku ei châ leipa vâta, nakao ta mo ei châ leipa vâta tah sala, pôhpa liata ahlao leipa châ hlei vei. Pachiahpa miakha nata miakha heta pôhpa raihriana liata a ngiah chy. Pachhah leipa ta a baokhâ rahrie chy awpa a châ. Chahawnahrachata, Krista pôhpa a châpa Awnanopa chhao a châ hra (I Kaw. 12:12-31).

3. Adyhna tha patlôuhpazy châ awpa:

Hebrai Châbu rohtuhpa ta “ngiapâna liata bie pahnokheituhpa (tha patlôuhpa) zy cha meihdo hawhta miah ama pahlypa vâta riahpha ngaitapa ta hmialâ pangai lymâ ei suh u. Miah pahnyphawpa maih nata moleina keimo liata khâchâ a baipa cha soh ei si la, hmialâ tôh lymâ ei suh u (Heb. 12:1-3) a tah. Thapatlôuhpazy he hlaotlohna thabya ama châ. Keimo chhao adyryhna nata apôhkha tha patlôuh ngâchhihpa eima châ awpa a châ. Khazohpa ta miah a piepa thaisona, hneina nata thatlôna zydua he hmiahaona nata adyuhna châta hmâh leipa ta, adyhna nata apôhkhana tha patlôna châta tiao hmâh chy u ei suh u.

Pachâ pahmaoh awpazy:

1. ‘Unawhzy adyryhpa nata apôhkhana liata ABeipa ta byhnâ tona bie a pie’ tahpa, âdona kyh reipahmaoh tua ei si.
2. Myanmar râh ‘adyuhna’ daihti liata thapatlôuhpazy (supporters) peimawhna kyh duah paziah tua rai?
3. Awnanopa nata khitlâh liata adyuhna tiao a y tyhpa he khapa vâta e a châ aw?



BO – 16

AWNANOPA PABOHSANA

Chavâta thlalôhna a tlôkhei awpa nata
tha a patlô raihriena a châ awpa hmozy a chadai
lymâ suh u (Rawma 14:19). Thlahpa apôhkhana a y
lymâ thei nawpa ta, adyhna ta a chahrypa ta tei
lymâ teh u (Eph. 4:3).

Awnanopa cha Khazohpa Thlahpa Pathaihp
pahrâna Achhyna o a châ. Chavâpa Awnanopa
apôhkhana pabohsa awpa he, ngiapâtuhp zydua
taovyuh a châ. Ahy rai, Khazohpa Achhyna o a
parao khiahta cha, cha chyhsa cha Khazohpa ta a
parao hra aw (I Kaw. 3:16-17). Apôhkhana he
Akaona hro liahmaripa a châ. Chavâta Awnanopa
chhôn liata apôhkhana a rao ha khiahta cha, Krista
pathipalôh chhao hriechheihpa ta a y. Awnanopa he
Khazohpa ta a Sawchapawpa matlupa hrona piepa
ta a paduapa a châ. A mâ ru chaipa hrona ta
paduapa Awnanopa cha kheitlu ta a mârupa chhao
ta pabohsa awpa ta miah a khoh. Khizaw râh nata
chyhsa pabohsa awpa ta “Chyhsa Pabohsana
Pheisaih” (People’s Defense Force) ama padua
khiahta cha, keimo chhochhi cha “Awnanopa
Apôhkhana Pabohsana Pheisaih” (Church Unity
Defense Force - CUDF) padua cheingei awpa a châ.
Awnanopa Apôhkhana a teina liata Zisu Krista

Lâthlôh eima chhih leipa khihta cha, “Pabohsana Pheisaih”(Defense Force) a tahpazy tlai he “Paraona Pheisaih” (Destruction Force) eima châ thei thlâh ha aw. Chavâta Khazohpa china nata zana chô ta, apôhkhana cha he hawhta tei awpa a châ.

1. Eima lyuna nata lyu leina (ananona eihpa) mopâ awpa:

Khazohpa ta chyhsa to alyu leina hneipa ta miah a tao chyupa vâta eima lyu leina kao he zana chô ta, pahnokhei veichâh awpa a peimawh. Anodeikua cha, achhuahna âlyupa Awnanopa miakha nata phu/py miakha liata eima y tita, eima lyu leina hlâta eima lyuna kao tlao pachâ via awpa âbyuh. Pawla ta “thlalôhna a tlôkhei awpa nata tha a patlô raihriena a châ awpa hmozy a chadai lymâ suh u” a tahpa he keimo chhao ta eima chadai awpa a châ.

2. Hmeiseih ta tlô theipa hnabeiseihna hnei awpa:

Eima chhuahpa hlaotloh thei n’awpa ta zawpi lâta hnabeiseihnazy eima rei pahmô tyh. Thokha cha tlô thai lei awpa hmiasai (mâsapa) hawhta châ ta, thokha deikua cha hmeiseihpa ta hlaotloh thei awpa a y. Eima tloh paki leina athei thlâh hana chô ta, tlô/hmô thei cheingeipa hmiasai (mâsapa) liata hnabeseihna pie awpa a châ. Pawla chhao ta, “paki hawpa nata a hmô hawpa ta a pachâ vana; Krista miah awna chhâ cha hmô thei awpa ta tlao ei cha dai” a tah.

3. Reipachhiena hlâta tha patlôna lâthlôh a chhih awpa:

Apôkhkana teina liata tha a patlôpa hlâta a a reipachhiepa ama hluh via tyh. Chyhsa seisâ thaipazy he rai a hria lei viapazy tlaô ama châ khoh kaw. Mo thokha cha, chyhsa thâpha rei awpa hlâta thâchhie rei awpa ama khoh via tyh. Zisu ta "seipa ta na y lei nawpata sei khah y (Mt. 7:1-2) a tah hra. Mohropa chakaotuhpa seituhpa cha ahy ma na châ? Â duah tlyma, a pao tlyma, ano zibeipa hmiakô liata a taopa a châ. Abeipa cha ano paduasa theipa a châpa vâta, â duah thlâh ha aw (Rm. 14:4). Thlalôhna a tlôkheipa nata tha a patlô raihriena a châ awpa hmozy tlaô eima chadai awpa a châ.

4. Haihipa bie nahthlie lei awpa:

Adyryhna nata apôkhkana teina liata seisâna, reipachhiena, bie do leipa tlâhzawna, haihipa ta chyhsa dôveipa ta biereina zydua cha Diabôla lâpi a châ (Zhn. 8:44). Social media zy liata haihipa bie a roh ngapazy he, Sâtâ ta a hmâpa chyhsazy ama châ. Ama bie nahthlie lei awpa a pha. Hmo pha leipa a taotuhpa cha moleina hmaokah nahthlie tyh ta, haihthaipa cha chochhiepa paleih lâ a nah a pachôh tyh (Bieso 17:4).

5. Khazohpa khozie hawhta buana pathlâ thei awpa:

Bei Zisu ta Awnanopazy hnohta buana pathlâna dâh he hawhta a reih. Na unawhpa ta na chô liata hmo a parao khiakta cha, ano lâ charei la, ano nata

nâma deita pahnopa ta â do leina cha chho mah y. A cha nathlie khihta cha, na unawhpa cha na pahnie hapa a châ. A cha nathlie vei khihta cha, bie to pahnokheituh awpa ta pano tlyma, pathôh tlyma a chhieh mah y. Âmo bie chhao cha a nathlie khoh vei khihta cha, **Awnanopa** chho mah y. Awnanopa bie chhao tlaita a nathlie khoh vei khihta cha, Zenitai nata chhiekheituhpa hawh (apôkhana a khoh leipa) ta pachâ awpa a châ (Mt. 18:15-17).

Zisu dei leipa ta cha a Pakipa chyhsa ahy hmâh y vei ei. Chahrasala, Khazohpa ta chyhsa a hmâpazy ama y; ama paki leipa chhao ta. "Nama thlahpa a vaihtuhpa Awnanopa chhithatuhpazy rei a ngiah teh u. Khazohpa hmiakô liata nama thâti a reih awpazy ama châpa vâta" (Heb. 13:17).

Pachâ pahmaoh awpazy:

1. Rev. J. Fawcett ta hla a phipa "Krizyh kyhpachâna, Palôh a chahry pi; Akaona palôh raoh aw pi, Vâmo taozie a châ" tahpa bie tawhta Awnanopa chhôn liata akaona, apôkhana" âbyuhna kyh rei teh?
2. Awnanopa akaona he kheihawhta eima pabohsa thei aw?
3. Adyryhna nata apôkhana biereina liata pakhâpadina a y tyhpazy he khapazy e a châ?



BO – 17

KHAZOHPA RAI PIEPA A PYHNA

Hmo phapa tao awpa ta, Khazohpa ta Zisu Krista liata miah a tao. Cha hmo pha tao awpa ta cha, eima chânazie awpa ta Khazohpa ta â vaw chhuanoh chhielepa a châ (Eph. 2:10).

Khazohpa ta Awnanopa a paduana liata rai miah a piepa miakha cha “chakaona” he a châ. Bei Zisu ta Paw lâta thlah a chhâ no ta, “Rai hria awpa eina piepa chi hria khai haw na ta, khizaw liata ei cha parônahsa haw” (Zhn. 17:4) a tah. Biehraï a thaipa Bonhoefer ta “Zisu cha mo hropa châta chyhsa a châ” a tah hra.

Zisu Krista cha Paw Khazohpa ta rai a piepa chakaotuhpa a châpa hawhta, Awnanopa chhao Zisu Krista ta rai a piepa chakao awpa ta paduapa a châ. Chavâta:

1. Keimo cha hmo phapa tao ta, Khazohpa chakao awpa ta taopa eima châ.

Nama taopa maih, chyhsa châta taopa hawhta pachâ leipa ta, Abeipa châta taopa hawhta tloa pachâpa ta, palôh pha ngaitapa ta hria lymâ teh u

(Kao. 3:23). Chyhsa nawh chaipa chô liata eima taopa he Khazohpa chô liata taopa a châ (Mt. 25:40). Hmo eima taopa zydua he, chyhsa a chakaopa hawhta pachâ leipa ta, ABeipa a chakaopa hawhta pachâpa ta, palôh hmeiseih ta chakao awpa a châ (Eph. 6:10).

2. Keimo cha chakao awpa ta pachhapa eima châ.

Keimo cha chyhsa pachha awpa nata chakao awpa ta pachhapa eima châ. Chyhsa he ngiapâna vâta ngiachhiena vâta pachha awpa he Khazohpa hmo achhua hpa a châ (2 Tim. 1:9). Khazohpa chakao ta palyupalih awpa ta mâ ta chaleipa eima châ (I Kaw. 6:20). Pity lapinô nô cha patlâhpa ta a ypa ta nahta, thyu ta, Zisu cha a chakao haw (Mk. 1:30-31).

3. Keimo cha Khazohpa chakao awpa ta awpa eima châ.

Chyhsa sawchapawpa cha chakaotuhpa châ awpa ta awpa a châpa hawhta (Mk. 10:45), keimo chhao Krista pôhpa pachiahpazy chakao awpa nata thei phapa pathei lymâ awpa ta atlypa eima châ (Zhn. 15:15-17).

4. Khazohpa chakao awpa ta bie piepa eima châ.

Chakao awpa bie piepa eima châpa vâta, tao lei thaipa châ vei, tao cheingei awpa a châ. Zisu ta a pachupazy phei a pasipa hawhta, keimo chhao tao hra awpa ta bie piepa eima châ (Zhn. 13:14). Chyhsa thatlôpazy heta chiehleipazy deichhy ta chakao awpa he Khazohpa achhuahna a châ.

Pachâ pahmaoh awpazy:

1. Awnanopa cha chakao awpa ta paduapa a châpa hawhta keimo local heta, cha chakaona liata âhrapa ta na pahno ma?
2. Awnanopa ta riahpaipazy eima deichhupa he chakaona miakha a châpa ta nâ pyh ma?
3. MTP ta a bievaopa "Chiehleipazy viasa" tahpa ta, rai a hriapa he Khazohpa chakaona a châ, tahpa nâ pyh thei ma? Khapa vâta e?



BO – 18

KHAZOHPA CHAKAO AWWA TA TAOPA EIMA CHÂ

Chyhsa to hmopiepa to chyu ei chi ta,
Khazohpa ngiachhiena nanopa nama topazy a
châpa pahnopâ ta, hmopiepa nama topazy cha
a chakaona raihrie nawpa châta hmâh teh u
(I Pity 4:10).

Chyhsapa cha Khazohpa ta zôpha kawpa ta a
paduapa, ano chakao awpa ta a taopa a châ.
Chyhsa dei châ vei; hrona a hneipa zydua chhao
Khazohpa ta yna su a raopa liata ano âchhuhpa
hlao patloh awpa ta a tao. Chyhsa ta o a sa hlâta,
khapa châta ei sa aw? (achhuahna), kheihawh ta ei
hmâh aw? tahpa a pachâ khai tawhta o design cha
a tao tyh. Khazohpa ta miah a tao hlâta, khizaw
liata eima chakao awpa liahsa a rao chhielie haw.
Chavâta keimo hawhpa chyhsa he alei chô liata y
vei ei. Krista liata hmo pha tao awpa ta Khazohpa
kuzô ta taopa eima châ. Eima chânazie awpa cha
Khazohpa ta a vaw chhuanoh chhieliepa a châ (Eph.
2:10). Abei Davi ta "ei pathipalôh zydua he nâ ta
tao chi ta, ei nô liata nâ paduatuhpa na châ.
Chichhihpa nata nôchhihpa ta tao ei châpa vâta, ei
cha reithai. Na hmotaopazy cha nôh a chhih ngaita

tahpa ei pahnopasia, cha cha na châbu liata ropa châ ta, a daihtita ta na paki lymâ (Hlazy 139:13-14, 16), a tah. A yzie cha eima chô liata hmo a vaw tlôpa zydua nata eima chânazy he hrao leipa sâkha hmâh y vei; chakaona châta miah a paduana sai a châ, tagna a châ.

Khazohpa ta ano chakao awpa ta miah a taonazie a ry liata palâsapa hawhta eima chu aw.

1. Thlahpa Hmosaipiepa:

Khazohpa ta chyhsa to hnohta chakaona châta ngiachhiena hmosaipa nanopa miah a pie chy. Nâ hriapasana nata nâ tlypa vâta na hmôpa châ vei; Krista ta riapha kawpa ta miah a piepa a châpa vâta aly ngaitapa ta hmâh awpa a châ. Chyhsa to ta miakha chy pie hlei leipa ta, ahy pakhata chhao a zydua pie khai hlei hra vei. Keimo mopakha a thôhna châta piepa châ leipa ta, chyhsazy chakao thei nawpa ta piepa a châ. Chyhsa zydua phahnai nawpa ta hmosaipa piepa eima châ. He yzie pahno thai leipa vâta Awnanopa liata a bua tyh - mohropa topa uahvâna nata âmo topa palaikheina. Pawla ta, 'keimasasyh a palaikhei awpa rai hnei va na, chyhsa to phahnai nawpa ta piepa a châpa vâta' a tah.

2. Pathipalôh:

Biehraï ta pathipalôh a tahpa he palôh khona zy, pahâhna zy, ngiabâhpa zy, palôh apielyuna zy,

mâsapa nata achhuahna zydua a ô khai. Pathipalôh tlokhuh ta 'kyh ei cha pachâ', tahpa nata â lyu. Bieso ta, "ti liata hmia tyhpa a lâpa hawhta, chyhsapa palôh cha chyhsa pachâna a palâsa tyh" (Biso 27:19) a tah. Eima reipa nata taopa zydua he chyhsapa palôh ta ataopa sai a châ. Palôh liata a bie pakhôpa cha pakah ta a reih papua tyh, tahpa a châ. Thapasana nata thapawhna (thathyuna) chhao pathipalôh liata a hlaopa a châ. Chavâta chyhsa palysa awpa achhuahpa ta ama hmô nota dei hria leipa ta, Krista seizy hawhta palôh hmeiseihpa ta Khazohpa khopa taopa ta chakao awpa a châ (Eph. 6:6).

3. Hmotaotheina

Chyhsa to hnohta thaina, taotheina nanopa piepa ama châ. Pikheipa thaina ama tahpa chhao, Khazohpa tawhta hmôpa a châ. Khazohpa ta Bezale hnohta sona, novâhna, pahnona nata zôthaina to hnei awpa ta Khazohpa Thlahpa ta a pabie (Pua. 31:3-4.). Chyhsa ta taothaina a hneipa zydua he, Khazohpa tawhtapa châ ta, Khazohpa rônahna châta hmâ awpa ta hmosaipa piepa a châ. Khazohpa khona maih liata hmâ awpa a châ.

4. Piekheipa hrozie hmâna

Chyhsa pakha nata pakha eima DNA âlyu leipa vâta pizie, hrozie nanopa eima hnei. Cha cha piekhei hro tlymâ, DNA hro tlâ eima tahpa a châ.

Pawla reikah eima hly khiakta cha, `chyhsa to hnohta raihria chi hluhpi piepa châ ta, hmotaotheina chhao piepa a châ, châhrasala a pietuhpa cha Khazohpa a châ. Chyhsa pakha nata pakha DNA âlyu leipa vâta eima hrozie, pielyuzie nata taotheina chhao alyu vei. Cha zydua cha Khazohpa chakaona châta a châ pyly.

5. Hro atyhpazy hmâna

Beihvituhpa ta ano khozie hawhta beih a vipa hawhta, Khazohpa ta hrona eima tyhpazy hmâpa ta eima hro a taopathi tyh. Hro eima tyhpazy he mohropa chakao nawpa ta Khazohpa ta pachhuah panohpa hawhta eima py awpa a pha. Chhônkha liata hro nâ tyhpa, achuna, py palya raihria, ngiapâna, chakaona nata riethei-rairuna liata nâ tyhpa hro zydua he chakaona vâta/châta nâ tyhpa a châ.

Pachâ pahmaoh awpazy:

1. Khazohpa ta a cha piepa hmosaipa na hneipa he kheihawhta e, local liata na hmâh thai aw?
2. Alei chô liata ahy hmâh ta nâma hawhpa, keima hawhpa y vei ei, eima nano khai tahpa na pyh ma?
3. Awnanopa chhôn liata alyu leina hema rie miah pathei via, eima lyuna he maw?



BO – 19

KHAZOHPA TA HMOPIEPA HMÂNA

Beihmeiseihpa, â do ngaitapa ta a siekheipa raihriatu hpa cha, noza awpa a châ leipa hawhta, a pyh tlâhpa ta Khazohpa hmiakô liata nâ duah thei nawpa ta, na theina zydua papua mah y (2 Timothy 2:15).

Khazohpa cha eima theina zydua papua ta chakao awpa he, a phuh hmeiseihpa a châ. Theina nata thaina nanopa hneipa ta taopa eima châ. Ngiachhiena vâta hmopiepa nanopa eima hneipa hawhta tlokhuh ta ano chakao awpa ta âhnawpa eima châ (Rm. 12:5). Cha hawhta chakao thei nawpa ta a ry liata palâsapazy hawhta eima chu aw.

1. Khazoh hmopie eihrâhpa pahno awpa:

Khazohpa ta chyhsa to hnohta ama raihria châ chyu ta hmotaotheina a pie. Chakaona liata mohropa hâ eima la awpazy a y thei aw. Chahasala, âmo hawhta tao thai khai hlei aw ma pi. Khazohpa ta khapa tlai he a eihrâhpa ta miah a pie? Thlahpa hmopiepa eima topa keimo tlaita eima pahno awpa a y aw; thokhazy cha mohropa ta miah ama cho awpa a y aw. Thokha hnohta pachu thaina, ryurei

thaina, ryhrao thaina, bierei thaina, zôthaina, hlasa thaina, totâh thaina, lyuchâ thaina, ... hpz. ama hneipa hawhta keimo topa cha eima pahno awpa a châ. Khazohpa ta miah piepa hawhta pahnopa cha apahlôh leipa ta tlokhuh eima hmâh awpa a châ. Cha kyh liata chakaona mâ hmô awpa hmiapasah awpa châ vei.

2. Sasyh hrozie nata palôh phaozie pahno awpa:

Pawla ta sasyh hrozie apahno awpa âbyuhzie he hawhta a reih. Khâpa hmah châ tlôh leipa ta, chyhsa peimawhpa hawhta â pachâpa cha, anosasyh a dôveipa a châ. Chavâta ama hmotaopa chy mohpasia mawh ei sy, (Kal. 6:3-4) a tah. Chyhsa thokha cha ama palôh a pasi, ama reisi, ama panawh, chiehleipazy ama deichhy khoh; hlaotlohpazy ama lykhei, ama palôh a pathaih. Thokha deikua cha, aru lâta ama by a lai, thokha â lâhâhpa ta ama palai, chhoreina nata pachâ piena khoh vei ei, ama nawhta, hiatliana, sasyh apabohsa khoh tuna, palôh pachhohna, hmiahmô tlâhphia hypa ta veiseih pakheina, chyhsa hropa tloh leina ama hmô thai kaw. Cha zydua cha eima châna hmeiseihpa a châpa chhao ta, a daihti ta liata hmâ thai khiahta cha, chakaona miakha a châ pyly. Chavâta 'kei he ahy ma ei châ', tahpa pahno awpa âbyuh.

3. Eima hro ta âtyhpazy tawhta achu awpa

Mawsi ta, sona palôh eima hnei thei nawpa ta, hro chhôn nohzy reizie awpa miah pachu mah y (Hla 90:12), a tahpa he a mâ a hnei kaw. Noh to ta hro eima tyhpazy he hrao leipa a châ lei nawpa ta, pachâ ta, achu ta, Khazohpa chakaona châta hmâ awpa a châ (Kal. 3:5). Pity ta Zisu a phei pasi awpa a dytha no ta, Zisu ta, "na chô liata ei hmotaopa he atahmâ pahno thai ngyu va chi, châhrasala noh hro ta na pahno aw (Zhn. 13:7), a tah. Eima hrona liata thlarana, tlalana, pasana, maophyuhna, hmiachhie-nozana nata hlaotloh leina eima tyhpa zydua he a mâ hnei kawpa, hmâ thai awpa ta tlaio eima chu via awpa a châ.

4. Na châna nata hro nâ tyhpa cha alypa ta a pyh teh.

Beihvituhpa ta beihlei hmâpa ta beih a vipa cha, a pha leipa hawhta a pahno khiakta cha, cha beihlei ta beih hropa a vi heih tyh. Beihvituhpa ku liata beihlei a ypa hawhta, ngiapâtuha cha Khazohpa ku liata eima y. A khonazie hawhta miah a taopathi awpa a châ. Thokha cha hro eima tyhpazy he, Khazohpa pasaipa a châ tahpa pachâ leipa ta, tlaio eima paphôn tyh (Rm. 9:19-21). Khazohpa khopa chyhsa eima vaw châ thei nawpa ta, a ngiachhiena ta miah a taopathina tlaio a châ. Aly kawpa ta Khazohpa eima chakaona hro he, Sâtâ ta miah parupâ awpa â chhuah. Eima chiehleinazy he

angiahmâpa ta eima tlalana châta hmâ awpa ta miah a tei, tahpa pahno awpa a pha. Chavâta Khazohpa hmosai piepa nata thlahpa hmopiepazy he chyhsa hropa topa nata âlyu leipa chhao ta, khâchâ pa-ia lymâpa ta, aly kawpa ta ano eima chakao awpa a châ.

Pachâ pahmaoh awpa:

1. `Na khoh leipa hro nâ tyhpa he, nâma taopathina châta a châ' tahpa nâ pyh ma?
2. Missionary rônahpa William Carey ta, "Khazohpa châta hmo rônah chaipa tao la, na kho chaipa hiah mah y" a tahpa he, nâ zaw kheita e na pachâ?
3. Khazohpa ta thlahpa hmosaipa a cha piepa he, hmâh awpa ta na no a za tyh ma?



BO – 20

SEI HAWHTA CHAKAONA

Ahy rai nama hry liata molaipa châ a khoh khiahta cha, châ chakaotuhpa ta a y awpa a châ. Ahy rai nama hry liata a hmiatua chaipa châ a khoh khiahta cha, chyhsa zydua sei ta a y awpa a châ (Maka 10:43-44).

Chyhsa eima chakaona he, Khazohpa eima chakaona a châ. Chyhsa to ta nohâh yna, moh phana, reithaina, palyupalihna nata bieheina eima tlaichhai chy. A chaolahmei ta y khoh leipa pi ta, luhpa châ awpa eima khoh. Cha cha chyhsa pizie nata hrozie rai a châ. Keimosasyh hmia pasâh khoh tuna heta Khazohpa chakaona miah a pakhâ tyh. Khazohpa achhuhpa hawhta chakao thei nawpa ta eima mopâ awpazy cha:

1. Khazohpa ta khizaw nata chyhsa chakao awpa ta a vaw tuapa cha Zisu a châ.

Chakaona rai hria awpa ta Khazohpa ta miah a aw tahpa pahnopasia awpa a pha. Khazohpa tuapa Mesia kyh liata Hrohsopa Isaih ta he hawhta a reih. "Nâ chakaotuhpa ta ei tlypa, ei duakheipa, ei lypa, ei Thlahpa ta so thlupa nata siana ta ei awpa" a tah. Khapazy e a chakao aw. "Râhzy liata siana nata

adona tlôkhei awpa, mochaopazy mo pavâsa awpa, lôo âtâhpazy papua awpa, zohna liata a ypazy pakhaihsa awpa, chyhsazy hnohta husona nata thlahpa pie awpa ta ngâchhih kawpa ta a chakao aw (Is. 42:1-7), a tah. Paw ta Zisu hnohta alei nata avâ liata bieheina zydua a pie. Tovyuh phapa a hmô thei nawpa châta châ vei; taovyuh a tao thein'awpa châta tiao a châ.

Zisu cha Khazohpa saw mathlupa châ taraw ta, Paw khohta hawhta a chakao thei nawpa ta anosasyh sei hawhta a tao ta, a reisipa ta a panawh ta, thina taih rei â ngiah. Palyupalihna nata thapha reina tlaichhai vei (Philp. 2:6-8). "Nâ tuatuhpa khopa tao awpa he khizaw lâta ei vyna chhâpa nata a raihria pangoh awpa he ei pati pahâh chaipa a châ" (Zhn. 4:34) a tah. Khazohpa achhuahna liahsa pahno ta, a hrokheipa a châ.

2. Zisu ta chyhsazy chakao awpa ta Awnanopa a padua.

Zisu ta liahsa thlah a chhâ khai tawhta a pachupazy â tlyh. Pachupazy ta awpa ama châzie ama pahnopasia thei nawpa ta "nâmo ta nâ tlyh vei ei chi, kei ta tiao cha tlyh ei na ta, sie ta thei pathei awpa nata khâ pathei awpa ta ei cha rao ei" (Zhn. 15:16) a tah. Awnanopa ta chakaona rai hria awpa ta Pastor zy a chahnaopa hawhta, Zisu ta a pachupazy phehi pasipa ta a chahnao.

Zisu ta âtlypazy hnohta chakao rai a pie. "Nama chô liata ei taopa hawhta, nâmo chhao tao hra teh u, chakaotuhpa cha a zibei hlâta lai via aw vei, khizaw beizy hawhta a pamolaisa khah u" a tah (Zhn. 13:5, 14-16). Khapa e ama chakao aw? "Sie u la, phopi zydua pachupa ta tao u la, a ngiapâpa maih bâti pachâsa u la, biepiepa zyh awpa ta pachu u la, ei mietakuzy pasapa ta mohôh teh u" (Mt. 28:19-20; Zhn. 21:15), Bei Zisu ta a tah. Cha sahlaozy cha Thlahpa Pathaihpa ta hyutuhpa (chhituhpa) ta a taopazy ama châ. Thokha lyuchâpa, thokha hrohsopa, thokha biechhotuhpa, thokha mietaku vaiuhpa, thokha pachutuhpa châ awpa ta Khazohpa ta a pachhuapanohpa a châ (Eph. 4:11-12).

3. Chyhsapa eima chakaopa he, Khazohpa eima chakaopa a châ.

Khazohpa ta Awnanopa siepahliepa ta chakao awpa ta miah a aw. Chavâta eima ly kaw awpa a châ. Awpa nata atlypa eima châpa vâ deita ta aly leipa si la, awpa hawhta eima chakaopa vâta tiao eima ly awpa a châ. Thei phapa pathei awpa ta awpa eima châ, tho phapa cha a thei tawhta pahnop a châ (Mt. 12:33); thei pathei leipa theiku kô cha chhiesa thlupa a châpa my awpa châ vei (Mt. 21:19).

Zeremiah ta, "diathlâpa ta ABeipa rai a hriapa cha chhiesapa ta y sala, thisaih palo awpa ta a zaozi a hmâh khoh leipa chhao cha chhiesapa ta y mawh sy" (Zer. 48:10) a tah. Sâsawna he Khazohpa châta

pananopa 'Nâzarai' a châ. A châna pachâ leipa ta, Laihsa Delilâ byh cha lahuah hawhta a hua ta, Nâzarai a châna bieparupa cha Delilâ a chho. Chavâta Khazohpa Thlahpa tawhtapa a thatlôna cha ano a puasai haw. A mokhaoh thaoh ei ta, keihrai ama dai haw. Chahrasala, achhâ chaina liata Khazohpa moh a padopa (a ropa) vâta a thatlôna hmâ thei heih awpa ta Khazohpa ta ryhpaohna hnôh chaipa (last chance) a pie (Ryr 13:5; 16:19; 16:28). A paw dôveipa ta byhnâ a paawsapa Zakaw deikua cha, Esaw riah chipa ta a râ ta, su miakha liata alô cha lahuah hmâpa ta a huah ta, mâ a sa. A mâ liata alei chô liata hleidy a vaw dao ta, vâlyuhchâpazy chô heih, kiah heih tahpa a hmô. A vaw hra nahta `he su liata ABeipa a vaw y tlai na, vaw pahno leipa na ta, tahpa ta cha su cha Bethel a bi. Khazohpa chakaotuhpazy eima diathlâ khiah cha thina, awna chhâ pahnopa ta eima chakao khiah, Khazohpa nata atyhna a châ.

Pachâ pahmaoh awpazy:

1. Chakaona rai a buh tlôh, a phapa ta hria tlôh vâ, mohropazy chakao awpa ta su parua tlôh vâ, tahpazy, awna chhâpa saw a reih leipazy ma? A chakao hualuapazy ma?
2. Zisu Chakaona (model) tawhta khapa hmozy nâ chu?
3. Chyhsa biehei kawpa nata molaipa eima châ thei nawpa ta kheita tao tua awpa a châ?

BO – 21

CHIEHLEINA LIATA KHAZOHPA HMOTAOTHEINA

Krista cha chiehleipa ta khaipâpa châ ta, châhrasala Khazohpa hmotaotheina ta a hroh. Keimo chhao ano liata chiehleipa châ pi ta, nâmo eima cha chakaopa vâna heta, Khazohpa hmotaotheina topa ta a hnohta eima hroh hra aw (2 Kaw. 13:4).

Tlokhuh ta Khazohpa eima chakaona thei lei n'awpa ta, Sâtâ ta "chiehleina lyuchâpa" a vaw tuah tyh. Cha chiehleina cha, Khazohpa ta hmotaotheina lâta tiao a pachâsa tyh, tahpa pahno awpa a pha. Khazohpa ta taotheina nata thatlôna miah a pie. Chahrasala hlaotlohna cha Khazohpa tawhta eima topa a châ. Keimo thaisona nata thatlôna vâta hlaotlohna hmôpa a châ khiah cha, apalai awpa eima hnei aw. Eima palai lei nawpa ta, chiehlei a vaw tlô awpa chhao, Khazohpa a pasaih tyh hra. Eima chiehleina daihti liata Khazohpa hmotaotheina â lâ tyhna bieparupazy a ry lia hawhta eima chu aw.

1. Chiehleina liata Khazohpa achhuahna a y.

Khazohpa ta asopazy maoh paphyuh nawpa ta hmo hrupazy a tlyh ta, thatlôpazy mao paphyuh nawpa ta, chiehleipazy tiao â tlyh (1 Kaw. 1:27). Chyhsa maohphyuh awpa he Khazohpa â lyna châ leipa ta,

ano hmotaotheina â lâna he â lyna tiao a châ. Khapa vâta e? Maohphyuhpa ta a ypazy he chyhsazy hmiakô liata ama no za ta, ama hmia a chiepa vâta "palôhru sipasa kawpa ta" ama y. Cha hawhpa chyhsazy chata Zisu hnohta ama pangai tyh. *Chiehleina* tahpa cha hmo panano/taopathi awpa ta *hmotaotheina a hnei leipa* tagna a châ. Chavâta chiehleina liata Khazohpa achhuahna cha ano hmotaotheina palâsa awpa he a châ.

2. Na chiehleina a pyh la, palâhâh teh.

Chiehleina daihti liata Khazohpa achhuahna eima pahno ha khiahta cha, eima chiehleina a pyh ta, noza leipa palâhâh ngâh awpa âbyuh. Nyu awpa châ vei. Pawla ta pheisypa a patlâhpa vâta Lystâ khihsawzy ta Pawla cha Khazohpa hawhta ama hmô no ta, ano ta 'keima cha Khazohpa châ va na, nâmo hawhpa chyhsa ei châ" (Hmt. 14:8-15) a tah. A hrona liata a chiehleina pahno ta, pôhpa liata ahloh hawhta khâchâ a chhôpa ha 'Sâtâ lyuchâpa' a châ tahpa ta a palâhâh hra. Pity ta Zisu hnohta "moleipa ei châ, na siesai teh" (Lka 5:8) tahpa ta â palâhâh nahta Zisu zituhpa châta awpa tiao a vaw châ. Pharisaihpa nata chhiekheituhpa thlahchhâna liata, a moleina nata chiehleina a palâhâhpa chhiekheituhpa cha thai pachâsapa ta a y, tahpa eima hmô (Lka.18:9-14).

Missionary rônahpa Hudson Tylor ta, "Khazohpa chyhsa rônahpazy he kha hlâta chyhsa chiehleipazy tiao ama châ" a tah hra. Mawsi cha pathipachhohpa

nata chatliechakohpa chyhsa a châpa vâta Izi chyhsa a thie; bie reih ta, lôpanô ta ti a vaw pua thlâh ha awpa tlai kha, chôchahrei ta alô cha a tu. Châhrasala, a chiehleina cha taopathipa a châ tawhta "chyhsa hry liata nônai chaipa" a vaw châ thlâh haw (Malu 12:3). Chavâta chyhsa to ta, eima chiehleina pahno ta, Khazohpa lâta palâhâh ngâh awpa apeimawh.

Pawla chhaota he hawhta â palâhâh. Hmo phapa tao awpa ei khotha he, taothei tyh leipa na ta, ei taokhoh leipa moleina tlao ei tao tyh. Chakaona liata riethei a taona zydua phih leipa ta a palâhâh (2 Kaw. 6:3-13). Pasa ei taothei awpa hlâta a hri viapa ta miah vi ta, hro awpa chhao a ngâ khao vana. Chiehleina, china nata thata achalyuna chôta, nama hry liata ei y' a tah.

3. Chiehleina liata Khazohpa hmotaotheina a lâ tyh.

Pawla ta, "hmotaotheina cha keimo tawhta châ leipa ta, Khazohpa eih a châ thei nawpa ta, he alei beih a châpa eima pôhpa liata tlao eima vao; ei chiehleina liata Khazohpa hmotaotheina cha pakipa ta a y tyh"(2Kaw. 12:7-9),a tah. Khazohpa ta a hmâpa chyhsazy he moh tua!

- 1) Kidia ta, 'kei la Izarei phozy hry liata pho nawh chaipa Manase pho nata ei chhônkhâ liata a nawh chaipa ei châ,' a tah (Ryr.6:15).
- 2) Mawsi ta, 'kei la, kâhchôleiâpa nata reikah sôhpa ei châ,' a tah (Pua. 4:10).

- 3) Abara cha riahchhiena vâta a lapinô kha ei sietanô a tah. Châhrasala Abaraha "Phopizy Paw" tahpa a vaw châ.
- 4) Apheipaw Davi cha "Khazohpa palôh a phaothpa" tahpa a vaw châ.
- 5) Pity, châ a thai leipa cha "lôpanô" tahpa a vaw châ.
- 6) Chahraochatôhpa Zawhana (tôhkalôh saw) ama tahpa kha "Kyhpachâ Zawhana" tahpa a vaw châ.
- 7) Rei awpa hluhpi a y aw. Kidia, Bâraka, Sâsawna, Zephathâ, Dâvi, Samuel nata hrohsopazy ... Khazohpa ta ama chiehleina zydua cha hmotaotheina lâta pachâsa ta, khinarâh paduatuhpa ama vaw châ haw.

Pachâ pahmaoh awpazy:

1. Pawla cha âpalai tu lei nawpa ta a pôhpa liata chiehleina ahloh piepa a châ. Keimo hrona liata chiehleina (tlalana) eima tyhpazy he Khazohpa tuapa a châ thei aw ma?
2. Zakaw cha Khazohpa tawhta â râ khao lei nawpa ta Valyuchâpa ta a chakhai liata hria ta, a pahleisa (At. 32:25). Achâhta cha keimo chhao eima thatlô tu lei nawpa ta miah a pahleisa hra, tahpa nâ pyh thei ma?
3. "Ngiaro nata lyna, Khazohpa vaw tua; miah pathaihisa n'awpa ngiachhie ta a tua" tahpa hla bie he, chiehleina liata Khazohpa hmotaotheina hawhta na pachâ beih ma?

BO – 22

KRISTA LYU AWWA TAOPA EIMA CHA

A pahno chhieliepazy cha, a Sawchapawpa hawhta y awpa ta a rao chhielie ei. A rao chhieliepa cha aw ta, a awpazy cha thai pachâsa ta, thai a pachâsapazy cha a palyupalih ei (Rawma 8:29,30).

Khazohpa ta “ano kakuapa nata ano lyupa” ta chyhsa a tao. Cha cha âthao no tawh tlaita, Khazohpa ta chyhsapa châta â chhuahpa a châ. A yzie cha Khazohpa ta ano ngiapâtuhpazy zydya cha a Sawchapawpa Zisu Krista lyupa nata ano hawhta hroh y awpa ta a tao, tagna a châ.

‘Krista lyupa ta ano hawhta yna’ tagna cha, ngiapâtuhpazy cha Khazohpa khozie hawhta Zisu zituh (pachu) hmeiseihpa ama châ awpa he, Khazohpa ta Awnanopa châta âchhuahpa a châ, tagna a châ.

Zisu Krista cha hmô thei leipa Khazohpa a lyupa, hmotaopa zydya hry liata a pih tua chaipa, ato ano vâta taopa nata ano châta taopa châ ta, ato ano liata â syhpahmaoh (Kao. 1:15-17). Chavâta Khazohpa âchhuahpa cha pahno thei nawpa ta Zisu

lâ moh awpa a châ (Heb. 12:1-3). Krista lyuna cha khapa e a châ?

1. Krista lyuna yzie

Chyhsapa ta Khazohpa eima lyuna cha:

- a. Miakhana cha *thlahpa chyhsa* (*spiritual being*) eima châna he a châ. Pôhpa thina he eima chhâna châ vei, eima thlahpa cha tlyzaw ta hroh awpa tlyma, chhâzaw ta hrie awpa pahropa, thi thai leipa ta taopa eima châ.
- b. Mianona cha Khazohpa hawhta *`pachâpazih thaipa'* (intellectual) ta taopa eima châ. Hmo yzie pachâ ta achu thaina, pachhupatlai thaina, pachâpazih ta rairunazy pathlâ thaina awpa taopa eima châ.
- c. Miathôhna cha *`azaona'* (relational) hneina a châ. Kyhpachâna pie ta, la thaina, sanawhrinô hawhta chyhsapazy nata azao thaina a châ.
- d. Miapalihna cha *"chhie nata pha pahnona"* (moral consciousness) a châ.
- e. Miangawhna cha *"chyhsapa pôhpa hawhta pakhopâ thaipa"* a châ; anodeikua cha Khazohpa cha chyhsapa hmisâ nata pôhpa hawh cheingei ta a y tahna châ hlei vei. Paw hawhta, nô hawhta, sawchapaw hawhta, sawchanô hawhta aly thaipa nata pachârôh thaipa, chyhsa hawhta pathipalôh a phaopa tahna a châ aw. Pawla ta *"siana nata pathaihna hmeiseihpa liata Khazohpa lyupa ta taopa chyhsa thiehpa"* (Eph. 4:24) a tahpa hawhpa a

châ. Hmotaotheina kyh liata chyhsapa heta Khazohpa lyu thei beih aw vei.

2. Krista hro lyuna

Chyhsapa ta Krista eima lyuna awpa cha a hrona eima hlykheina he a châ. Ngiachhiena vâta ngiapâna ta pachhapa eima châpa vâta, Krista hnohta khaipâpa ta y pi ta, a hnohta pathyupa ta eima y haw hra. Chavâta hrona thiehpa hneina liata Krista hro lyuna, ano hawhta hrona, eima hnei tahna a châ.

Siana nata pathaihna kyh liata Krista lyu awpa ta hmotao thiehpa nata chyhsa thiehpa eima châ. Pawla ta, hrozie parahpa chysia cha pahluh u la, hrona thiehpa chysia tiao atobi teh u; ABeipa liata namâ ngiarhipa hawhta chhônkhâ liata vahpa-lapinô, nôpaw-sawzy, zibeipa-seizy likah liata chhao pakha nata pakha a ngiarh teh u (Kao. 3:8-10, 18-22) a tahpa hawhpa Krizyhpâ cha Krista hawhta hroh awpa a châ.

3. Krista lyu awpa ta rao chhieliena

‘Rao chhiehlie’ tahpa he ‘thokha cha pachha châ awpa nata thokha cha pachha châ lei awpa ta Khazohpa ta a raochhielie’ tahpa hawhta pachâ ma pi. Khazohpa ta ano a vaw ngiapâ awpa zydua cha ‘Krista lyupa ama hroh aw’ a rao chhielie tahna tiao a châ. Pheisaih a châ awpa cha ‘pheisaih châna dâh raopa hawhta a y aw’ tahpa nata âlyu.

Ngiapâtuhpazy cha Khazohpa saw nata a ryu to awpa ama châpa vâta, Zisu Krista hawhta hroh awpa a châ. Khazohpa cha âchhuhpa hawhta Awnanopa châta a tao lymâ aw tahna a châ.

4. Krista lyu awpa ta taopathina

Ngiapâtuhpazy Krista hawhta ama hroh thei nawpa ta taopathipa ta ama y. Kheita a tao pathi?

- a. *Thlahpa Pathaihpâ hmâpa ta*: Thlahpa Pathaihpâ raihriana vâta ngiapâtuhpâ cha Krista lyuna liata a laihseih. Thlahpa chata moleina kyh, siana kyh, pachiana kyh nata Thlahpa theilâ pathei awpa ta chyhsa liata a hria tyh (Zhn. 16:8; Kal. 5:22-23).

- b. *Khazohpa Bie, chyhsa nata hmo yzie anano haipazy hmâpa ta*: Khazohpa ta a BIE hmâpa ta chyhsa hro a taopathi tyh. Khazohpa Biehrai cha huso thlupa a châpa vâta hmo taothei ta, pachuna, chhoreina nata siana pachuna liata hmâ awpa a châ (Heb. 4:12; 2 Tim. 3:16). Chyhsa taopathi nawpa ta Khazohpa ta chyhsa lilawh a hmâh hra. Hmo yzie ânano haipazy he, chyhsa vâta/châta a ypa a châpa vâta chyhsa taopathituhpâ a châ hra.

- c. *Daihti vâro byuh* : Ngiapâna/thlahpa hro pitloh thei nawpa ta cha, daihti vâro la awpa âbyuh thei aw. Pachha châna hawhta ei kha ngiapâna vâta chhâzaw ta a tlohpa, tao byuh khao leipa

hawhpa châ vei. Biehraï reih lylia, apakhy lylia, thlahchhâ lylia, chakao lylia... tao lyliapa ta daihti vâro la awpa âbyuh aw. ABeipa rônahpa lyuna lâta pananopa ta eima y lymâ. Cha cha ABeipa tawhta eima hmôpa Thlahpa Pathaihpa vâta a châ (2 Kaw. 3:18).

Pachâ pahmaoh awpazy:

1. Chyhsapa ta Khazohpa eima lyupazy reih tua.
2. Krista lyuna tahpa na novâhna dâh reih teh.
3. Kalatia 5:22-23 liata Krista lyu thei nawpa ta Thlahpa theilâzy duah paziah tua.



BO – 23

KRISTA LYUNA LIATA LAISEIHNA

Chatanachata chyhsa so piehpiepa nata dôthaina
hmotaopa tichatlaopazy ta hao lâ, he lâ a chatlaopa
nata pachuna ziza to ta a phao pahaipa hawtipa châ
khao aw ma pi. Kyhpachâna ta biedopa reipa ta,
kyh to liata eima laiseih lymâ aw
(Eph. 4:14-15).

Krista lyuna hro liata laiseih thei nawpa ta
achhuahna chhaota ahlâ awpa a peimawh.
Ngiapâna liata kô pasina he pitlohna thliena châ hlei
vei. Thlahpa hro liata pitloh thei nawpa ta, laiseih
khohna, laiseih awpa ta biechhawhna, hriapazih
lymâ ta, tao hualua awpa âbyuh.

Zisu ta Mathai hnohta na zi teh, tah ta. Mathai ta
thyu ta, tlâ a zi (Mt. 9:9). Zisu ta a pachupazy a aw.
Awpa ta ama y no ta, hmo yzie zydua ama pahno
khaipa vâta a zipa châ hlei vei ei; Zi awpa ta bie
ama chhawhpa vâta a zipa ama châ. Zisu ama pazi
tawhta, riethei âchhizie ama vaw pahno. Zisu
zituhpazy pitlohna taihta laiseih thei nawpa ta hezy
pachâ awpa âbyuh.

1. Khazohpa taovyuh nata chyhsapa taovyuh pahno awpa:

Thlahpa Pathaihpa cha Khazohpa Bie hmâpa ta ano zituhpa chhôn liata rai a hria. Zisu ta, 'pahrotuhpa cha Thlahpa a châ. Nama hnohta BIE ei reipazy he, Thlahpa châ ta, hrona chhao a châ (Zawhana 6:63), a tah. Thlahpa chata eima chiehleinazy pahno ta, kheihawhta thlahchhâ awpa a châ, tahpa eima pahno thai khao leina duahmo liata, keimo châta thlah a chhâ tyh (Rm. 8:26-27). Cha cha Khazohpa taovyuh a châ.

Khazohpa bie ta 'nama pachhana cha chipa nata chalyupa ta hria papua teh u (Philp. 2:12),' a tahpa he chyhsapa taovyuh a châ. Khazohpa ta keimo liata a hria awpa cha Ano taovyuh a châ. Chyhsa ta a hria papua awpa cha keimo taovyuh a châ. Chavâta ngiapâna liata laiseih thei nawpa ta, Khazohpa nata chyhsa eima hrialâh awpa âbyuh. Philp. 2:12 bie he pachha châna kyh châ leipa ta, laiseih kyh reina tiao a châ. Pachha eima châ thei nawpa ta, eima hria papua awpa âbyuhna kyh châ vei; Zisu ta miah a pachha ha chiehpa kyh liata deikua cha, keimo tlaita hria papua lymâ awpa a châ. Khazohpa ta Krista liata hrona thiehpa miah a pie hawpa cha, keimo ta chipa nata achalyupa ta eima palaiseihsa awpa a châ. A yzie cha rietheirairunazy hluhpi y hra sala, palôh hmeiseihpa ta hria papua awpa âbyuh, tagna a châ.

2. Sasyh hro chhihthana dâh pathlai awpa;

Hrozie panano thei nawpa ta palôh pachâna pathlai/panano tua awpa âbyuh. Biehrâi ta, `na palôh pakhâta ta vaih mah y, hrona tihnawh vaw puana châ tlôh ta' (Bieso 4:23), a tah. Mawtaw saike ta sie haipa lâpi tawhta lâthlôh hropa lâ na pakei khoh khihta cha, na ku, na mo nata phei hmâ awpa a châ. Chahawhranachata, eima chhih haipa lâthlôh tawhta Khazohpa lâthlôh lâta sie thei nawpa ta cha, pathipalôh pachâna eima pathlai tua awpa a châ. Khazohpa khopa, phapa, pathaihpâ, aly tlâhpâ hrona lâta palôh paheihsapâ ta ahlâ awpa a châ (Rm. 12:13). Chatanachata eima palôh pachânazy cha pathiehpâ a vaw châ aw (Eph. 4:23).

3. Krista palôh phaoh awpa:

Krista Zisu liata a ypa palôh he, keimo liata paysa awpa a châ (Philp. 2:5). Ngiapâna liata hawti palôh phaoh lei awpa, moleina kyh liata deikua cha hawsaih hawhta y awpa nata palôh lâ deikua cha pitlohpa ta y awpa ta, Pawla ta miah a pachu. (I Kaw. 14:20). Hawtipa cha anosasyh châ deita a pachâpa a châ.

Zisu ta hawtipa nata pitlohpa ama lyu leizie, he hawhta a reih. `Na hawti no ta cha na chai a saih chi ta, na khona lâ maih na sie tyh. Na pitloh ti deikua cha, na kuzy pazawh aw chi ta, mohropa ta na chai cha saih aw ei ta, na kho leina lâ ama cha

daophi aw (Zhn. 21:18). Pitlohna hro cha keimo khonazie châ khao leipa ta, Khazohpa a pachhua hpa hawhta siena tiao a châ.

Pachâ pahmaoh awpazy:

1. Philipi 2:5-8 ta a palâsapa Krista palôh cha khapazy he a châ?
2. Philip 2:12 liata "nama pachhana châta hria papua teh" tahpa nata "nama pachhana hria papua teh" tahpa âlyu leina reih pahmaoh teh? (Mara Biehraï Pua thie hpa Moh teh).
3. Kô hluhpi Kri a zy hpa hapa cha ngiapâna liata Krizyh thie hpa hlâta a pitloh parei aw, tahpa he â do ma? Khapa vata e?



BO – 24

BIE HMEISEIHPA TA HRO PANANONA

Zisu ta, “Ei bie liata nama y thlâh ha khiakta cha, ei pachupa dopazy nama châ aw. Biehmeiseihpa pahno aw ei chi ta, biehmeiseihpa ta kho ta a cha palaisa aw ei,” tah ta (Zhn. 8:31-23).

Pitlohna taihta laiseih thei nawpa ta cha biedo leipa zydua, Khazohpa biehmeiseihpa ta pathaisa tua awpa âbyuh (Zhn. 17:17). Khazohpa bie deita he, chyhsa pakipa eima châ thei nawpa ta raihria phapa to châta miah tobituhpa a châ (2 Tim. 2:17). Ngiapâtuhsa cha ano khozie hawhta biehmeiseihpa liata a sapa eima châ (Zami 1:18). Eima hrona he noh to ta taopathipa ta a y lymâ thei nawpa ta khapa eima tao aw?

1. Khazohpa bie cha thlahpa pati a châpa vâta pachô awpa a châ.

Noh to ta Thlahpa lâ Pati nie awpa eima chakâh lei nawpa ta, Khazohpa bie cha eima pachô awpa a châ. Khazohpa Bie cha thlahpa sâhpiti, hrona viachhâ, pati hmeiseihpa, kheihiti hlâta thlôh viapa tahpa niedo ta pakhopa a châ (1 Pity 2:2; Mt. 4:4; I Kaw. 3:2; Hla 119:103). Thlahpa hro thatlô-laiseihna châta thlahpa lâ pati he, noh to pati hawhta pasô awpa a châ.

2. Khazohpa Bie hmotaotheina a pyh awpa:

Khazohpa bie cha hmotaothei ta, zaozi koh nata ha tiah raihriepa hlâta a tiah via. Khazohpa bie cha noh to eima lâpi miah chhotuhpa nata pakhaihsatuhpa a châ. Khazohpa ryhpa cha pha paki ta, hrona taopathi ta, ahrupazy a pasosa. Cha bie cha pachuna châta zy, chhoreina châta zy, siana pachuna châta zy a phahnai ngaita (Heb.4:12; Hlazy 119:105; 19:7; 2 Tim. 3:16).

3. Khazohpa bie ta eima hrona bie pahneisa awpa:

Biehraï he Khazohpa Bie a châ, tahpa a pyh awpa dei châ leipa ta, eima hrona liata bie pahneisa awpa âbyuh. Cha hawhta bie a hnei thei nawpata he hawhta eima tao aw.

- a. **A pyh awpa:** Khazohpa bie cha pathipalôh pahypa ta nahthlie ta apyh awpa a châ.
- b. **Reih lymâ awpa:** Khazohpa bie cha eima zyh thei nawpa ta reih lymâ awpa a châ.
- c. **Achu lymâ awpa:** Khazohpa ryhpa cha moh ta, cha hawhta hroh ta, ryhpa cha thei ta, zyh ta, ryhpa hawhta a taopa chyhsa cha a hmotaopa liata thlaochhipa ta a y aw (Zami 1:25).

- d. **Avao lymâ awpa:** Krista bie cha palôh liata biepakhôpa ta y mawh sy (Kao. 3:16).
- e. **Pachâ lyima awpa:** Khazohpa ryhpa cha chhô nah zâ pachâ awpa a châ (Hla 1:2).
- f. **Hmâh lymâ awpa:** Khazohpa biezy he thei ta a taopa maih cha, chyhsa sopa, lôpanô chô liata o a sapa hawhta a châ (Mt. 7:24).

Pachâ pahmaoh awpazy:

1. Khazohpa Biehraï a reih tyhpa nata a reih leipazy ama hro ânana a y ma? Rei pahmaoh tua teh?
2. Khazohpa bie keimo liata bie a hnei via lymâ thei nawpa ta kheita eima tao aw?
3. Khazohpa bie he hmo a tao thei, tahpa kheihawhta na pahno?



BO – 25

RIETHEINA TAWHTA LAISEIHNA

Khazohpa kyh a pachâtuha, ano achhuahna hawhta a awpazy châta, Khazohpa ta ato liata ama pha nawpa ta a hriapa tyh ei tahpa eima pahno (Rawma 8:29).

Riethei, rairuna nata pasataona to hnohky liata Khazohpa achhuahna a y, tahpa pahno awpa a pha. Khizaw liata eima y chhôn ta, riethei pasa taona he a y lymâ thlâh ha aw. Chahrasala cha zydua maniah pahniepatuha cha Zisu a châ (Zhn. 16:33). Riethei pasataopa vâta palôh keichheihpa ta yna heta Khazohpa miah a pahniasa. Chavâta chhiena kao lâ tawhta moh leipa ta, paduana kao lâta tlaoh moh awpa a pha (Hla 34:18). Chyhsa hluhpi cha eima phasana noh liata Khazohpa my pi ta, tlalana daihti liata Ano eima hnia tyh.

Khazohpa ta Zawsî kha lôo tawhta a papua thei thlâh haw. Daniel chhao kha chakeibârôn pakah tawhta a pachha thei thlâh haw. Zeremiah chhao kha Mâkia khaotlô liata chiatlao tawhta a pachha thei thlâh haw (Zer.38:7). Pawla chhao kha ei (3) tlai balyh raokheipa ta tilaipei liata phao pahaipa ta a y lei nawpa ta a taothei thlâh haw. Châharsala, Khazohpa ta pachha vei ei. Riethei ama tao awpa

tiao a pasaih, Khazohpa ama hnia via thei nawpa ta. Khazohpa eima ngâ thei nawpa ta kha hmo kha a vaw ypa a châ (2 Kaw. 1:9). Khazohpa pasaina y leipa ta, ngiapâtuhpazy chô liata hmo tlô chakhy vei.

Rawma 8:28-29 tawhta achu awpa:

Keimo khona hawhta sai ta, Khazohpa ta miah a chhihtha aw, tahna châ vei. Paki leina khizaw liata eima y chypa vâta, rietheina nata pasa taona cha a y lymâ thlâh ha awpa. Chavâta "na khopa avâ liata ama taopa hawhta, alei liata taopa ta y mawh sy"¹ tahpa ta thlah eima chhâpa a châ. Rawma 8:28-29 bie liata eima pachâ via awpa cha:

Khazohpa kyh a pachâtuhpata nata a awpazy:

Chyhsa to châta bie â taihpa châ vei; Khazohpa saw châna ahneipazy deita châta a châ.

Achhuahna hawhta: Khapa achhuahna ma? Krista lyu awpa, Krista hawhta hroh awpa ta Khazohpa ta âchhuahna kyh reina a châ.

Khazohpa ta: Hmo eima tyhpa zydua hnohky liata a pataosatuhpa cha Khazohpa a châ. Chyhsa cha taochhei tyh pi ta, Khazohpa deikua cha taochhei beih vei.

¹ Mathai 6:10.

Ato liata: Khazohpa ta eima hrona châta âchhuahpa liata eima chô liata hmo a vaw tlô awpa zydua a ô khai- chhiena nata phana chhao. Ano chata a chhie chaipa duahmo liata eima y no ta, hmo phapa a vaw tlôkhei tyh.

Ama pha nawpa ta: Hrona ta âtyhpa zydua a pha khai, tagna châ hlei vei. Rei khoh chaipa cha, chhiena hluhpi hry tawhta a phapa a vaw tlôkhei awpa kyh reina a châ. Zisu Krista pathlatuhpazy alaichadaina liata Tâmâri, Rahâbi, Ruthi nata Bâshebâ zy hawhpa moleipazy moh ama pahla. Châhrasala Khazohpa ta moleipazy tawhta phapa a vaw tlôkhei haw. Khazohpa achhuahna cha rietheirairuna nata pasataona hlâta a rônah via.

A hriapa tyh: Eima chô liata hmo a vaw tlôpazy he, mohropazy ta ama tyh beih leipazy miah a vaw tlô thlupa châ vei. Hro ta eima tyh awpa nata Khazohpa cha hmaohkha ta ama hria khoh tyh, ano achhuahna pitloh thei nawpa ta, tagna a châ.

Eima pahno: Eima chô liata hmo a vaw tlôpazy he keimo pachâpachih thaipa vâta châ vei; Kyh miah a pachâpa Khazohpa ta a Bie hmâpa ta a vaw patlôsapa a châ tahpa pahnona he, Khazohpa tawhta â vya pahnona a châ.

Chavâta riethei eima taona maih ta, he hawhta pachâ awpa ta Khazohpa ta miah a khoh.

1. Khazohpa achhuahna he keima châta a phapa a châ (Zer. 29:11).
2. ABeipa liata khâ thaphapa ta ano lâta alyna bie hlâ teh (Philipi 4:4-6; 2 Thes. 5:18).
3. Hnabei dypa ta hnôh â sy lei awpa (Zami 1:3-4); Ngiapâna pasiana ta tiamana tao ta, tiamana chata pitlohna taihta rai a hria hualua tyh.

Pachâ pahmaoh awpazy:

1. Rawma 8:28-29na bie he, nâ pyh thei ma?
2. Na hrona liata rairuna nâ tyhpa vâta hmo rônah viapa a vaw tlôkheipa a y ma?
3. Hro rietheina nata pasataona heta ngiapâna a palaiseihsa tahpa he na pyh thei ma?



BO – 26

THÂTIHPHA TLÔ NOH

**KHAZOHPA CHYHSAZY CHÂTA OTLÔ
ACHHUAH DY SUH VY
(2 Ab. 4:8-10)**

Chanô ta a vahpa hnohta, “pachâ teh, he chyhsa, khâ miah a chapia tyhpa he Khazohpa chyhsa pathaihpa a châ tahpa ei pahno. Vâphuh liata pâhchhông chhông sih la, chhôngpadâhpa chyhpa taopa sih la, rakhô, tlâhkhai, dyuchhai nata meihông zy sopa sih la, keimo lâ â vyna maihta, cha liata â ngia tyhna hâh ta,” tah ta (2 Abei 4:9-10).

Thâtihipha Tlô Noh ahmâ tuana

London khihpi liata a pahrâla Missionary rônahpa Rev. R. A. Lorrain nata Mrs. Maud Louisa Ulander Lorrain (Vailimapaw nata Vailimanô) zy cha Thâtihipha chho awpa ta 1907 September 26 noh ta, Mara râh Saikao khih ama vaw tlô. Âmo ama vaw tlôna noh he “Thâtihipha Tlô Noh” tahpa ta, Mara Awnanopa ta Noh Peimawhpa ta eima hmâh.

Eima Awnanopa heta kha hlâta cha Thâtihipha Tlô Noh he eima ly tu leipa hawhta alyu. 1986 May 25 noh ta Sabyhpi liata MIEC Executive Committee

Meeting hneipa a châ. Cha liata biepathlupa MIEC/EC-03/1986 liata he hawhta eima hmô.

August 1, 1966 he Missionary tua papua tua chaina noh a châpa vâta kô ta tota August 1st he Noh Peimawhpa "Râzohpa Noh" ta hmâ lymâ awpa khona kyh nata September 26 he **Thâtihpha Tiô Noh ta hmâ lei awpa** ta khona kyh... reipa châ ta... tahpa a châ.

MIEC & MIC eima pôhkha khai, MEC Assembly cha 1990 March 1-5 nohta Ngephepi liata hneipa a châ. MEC/ASS-045/1990 ta he hawhta bie a pathlu.

September 26 noh he, atheithlâhâna noh ta ahmâpa châ sa la, Marapa ta Razohpa a hria tuana noh he, kudaona y bâ sa la, tahpa paryhsapa a châ.

He biepathlupa hawhta MEC President Rev. K. Teitu ta Târi 1990 June 19 noh ta MEC/Gen. 1/Order-30/90 ta local church to lâta he hawhta châ a papua.

"September 26 noh ta Missionary Reginald Aurthur Lorrain nata a lapinô eima rân leilô ama tly tuana, ama vaw ngiana noh a châ. Chavâta he noh he "**Thâtihpha Tiô Noh**" tahpa ta noh peimawhpa ta hmâ awpa a châ aw. He noh ta sôh thyuna a y hra aw." tahpa ta châ a papua.

Chavâta MEC heta September 26 "Thâtihpha Tiô Noh" he 1990 September 26 noh ta a hmâ tua, tah theipa a châ. Ryhpaohna hawhta sôh thyuna chhao a y lymâ hra.

Thâtiŋpha Alyna Sôh (TAS)

2001 kô liata MEC Assembly EC Meeting cha Sabyhpi liata hneipa a châ. Mission sôh a pôh via lymâ thei nawpa ta kyh reipa a châ. Cha liata Rev. Pahrang (Grace-paw) ta MCC mohta, lymâ sâkha ei cha pie aw ei, tahpa ta he hawhta Sôhnawh miakha a vaw piepa a châ.

Marapa he khichhai a pasô thaipa eima châ.

Khichhai peimawhpa miah ama tlô khiah, awpinô a ti thlâ haipa thiepa ta tihâh eima taopâ tyh. Keimo o liata a tlô leipa chhao ta, tihâh pahâh chaipa chhopa ta pati nie eima aw tyh.

Khichhai zydua hry liata eima pasô via pachai awpa cha, Thâtiŋpha miah vaw tlôkheituhpa eima misawnarizy ama châ. Chavâta MEC odyh to ta, September 26 noh "Thâtiŋpha Tlô Noh" ta misawnari Vailimapaw nata Vailimanô pati nie eima hrua awpa a châ. Awhkhypa pôhkha chyu tihâh ta pachhuaŋpanoh aw pi ta, cha awhkhypa cha thie leipa ta Achhyna O lâ vaw cheih u la, Mission Board tawhta eima zuah aw. Cha zuana mâ cha "Thâtiŋpha Alyna Sôh" (TAS) tahpa awpa ta paryhsapa a châ.

Chavâta 2001 September 26 noh tawhta Odyh to Khazohpa chyhsa a châpa misawnarizy otlô patlôsana prôkara taopa a châ. Awnanopa ta thata a thôkhei pi ta, mission chakaona liata chhao byhnâ

eima to hmeiseih. 2015-2023 taih "Thâti hpha Alyna Sôh" (TAS) thyu theipazie cha he hawhta a châ.

Kô	Thyu zie
2015	5,229,125
2016	6,178,650
2017	7,516,880
2018	16,321,050
2019	15,066,800
2020	18,409,850
2021	20,956,600
2022	26,301,150
2023	38,544,900
2024	?

2024 September 26 noh ta local church to ta, eima misawnari rônahpazy pati nie aw aw pi ta, tihâh pahâh chaipa pachhuahpanoh aw pi ta, tihâh nata pati hryuhpa zie cha "Thâti hpha Alyna Sôh" châta Achhyna o la eima vaw cheih awpa a châ aw.

2024 Thâti hpha Tlô Noh

Khazohpa chyhsazy a ly ta, o patlôsazy ama tlala tyh, tahpa pahno beih ma pi. Achhâ cha Khazohpa bietaihpa a ypa vâta a châ. Hrohsopa a lypa cha hrohsopa lyma, chyhsa siapa a lypa cha chyhsa siapa lymâ, pachupa a lypa cha pachupa lymâ ama hmô aw. Chyhsa chyh chaipazy ama châpa chhao ta, Khazohpa chakaotuhpa ama châpa vâta âmo a

vaw lypa cha ama lymâ pahlei cheita aw vei ei (Mt. 10:4-42).

1. **1 Abei 17:8-24** liata Zerepha nôhmei ta hrohsopa Elaiza a vaw lyna kyh eima hmô.

Nôhmeipa kha ano nata sawzy nie awpa châta hmâhta âdaih leipa tlai kha, Khazohpa chyhsa Elaiza cha a vaw ly ta, o patlô ta, viahchhâ chateipa a pie. ABeipa ta cha râh liata avâ a pasuasa hla lei, Zerepha chanô cha viahchhâ nata sathaw pahla leipa ta hrohsopa chata byhnâ a awpâ. Cha dei châ vei; a sawchapawpa a thi hawpa chhao kha, pahropa ta a pathyupa.

2. **2 Abei 4:9-10** liata Sunâ chanô heta hrohsopa Elaisâh a vaw ly kyh eima hmô.

Hrosohpa Elaiza ta Sunâ kih a vaw chapiana maih ta, cha chanô heta a o liata a patlôsa tyh. O patlôsana dei châ vei, pati a nie awpa, â zia nawpa chhônpadâh, rakhô, tlâhkhai, dyuchhai, meióh nata âbyuhpa maih patohpatiapa ta, Khazohpa khichhah, hrohsopa cha â vaw ly.

Hrohsopa Elaisâh ta a chakaotuhpa hnohta, miah pasô kaw chi ta, khapa ei cha taopa hra aw, tahpa a chakaotuhpa a pahiahrisa. Sunâ chanô chata khapa hmâh a ngiah va na, a tah haw. Âmo ama hia leipa, chhônkhâ ta ama ngiah chaipa sawchapawpa pie awpa ta bie a taih. Chatawhta Sunâ chanô cha sawchapawpa a vaw hnei haw.

Sunâ chanô ta sawchapaw hnei ta, chahrasala pasa ta a thi haw. Hrohsopa rakhô liata pazia ei ta,

Elaisâh va aw ei ta, a vaw tlô nahta a sawchapawpa cha pathyupa a châ haw. Khazohpa khichhai a lypa maih, chhônkhâ byhnâ ama to.

3. **Luka 24:13-35** liata Emâsâ lâpi liata a siepa chyhsa panozy ta ama o liata Zisu tlô awpa ta ama hruana kyh eima hmô. Lâpi liata bie ama chho haipa kha, Zisu a châ tahpa pahno vei ei. Lâpi tlykha ta Zerusalem liata Zisu ama khaipâna kyh reikheipa ta ama sie lymâ. Zâ la khih ama tlô nah ta, Zisu ama thlyu. "Eima o liata tlô mah y, zâlâ ha ta, noh chhao a tla daihmâ ha hih," tah ei ta. Chatanachata Zisu cha ama hnohta a tlô. Pati nie awpa ta ama hnohta a tyuh ta, viahchhâ la ta, byhnâ a vaw aw nahta, ama mo a vaw pavâ haw. Novâhna thiehpa ama vaw hnei. Zisu châta o tlô ama pachhuahtanohta vâta sapa nata thlahpa mopavâna byhnâ ama topa eima hmô.

4. **Khazohpa chyhsazy o patlôsa ta, pasôh kawpa ta a vaw lypazy he, Khazohpa ta byhnâ pie leipa ta siesai beih vei.**

Chavâta keimo chhao Zisu khichhai patlô ei si la, misawnari khichhai patlô ei si la, Thâtihpha chhotuhpazy a lypa ta o patlô ei si la, eima pahno leipa ta Vâlyuchâpazy chhao miah ama vaw tlô tyh tahpa pahnopa ta, khichhaizy pasô thai kawpa ta, eima patlô awpa a pha aw. Chyhsapa mokhaoh tawhta moh leipa ei si la, Khazohpa chyhsa peimawhpazy ama châ tahpa pachâna chô ta, khichhai eima ly awpa a pha aw.

REIPASAONA TAWHTA LAISEIHNA

Reipasaona (pasiana) liata â ipata a duaupa cha a nohlao na. Pasiana a pahnie tita, Khazohpa ta ano kyh a pachâtuhpazy hnohta bie â taihpa hrona lakho a to aw (Zami 1:12).

Reipasaona he hmo phapa tao ta, laiseih thei nawpa ta rypaoh phapa sâkha a châ. Reipasaona he Sâtâ ta miah a parao nawpa ta a hmâpa chhiachhi a châ. Cha paraona chhaichhi tlai cha, Khazohpa ta chyhsapa hro palaiseihsa ta paduana châta a hmâ khoh. Reipasaona hnawh châta Sâtâ châ ta, Sâtâ ta a hmâpa chhaichhizy cha he hawhta a châ.

1. Reipasaona atyhna

Aohraohna, uhvâna, khohna eima palôh liata a ypa cha reipasaona chhaichhi châta a hmâh tyh. Sâtâ ta eima palôh liata *pachâna* pahneisa tua ta, *aohraohna* tlyma, *uhvâna* tlyma hmâpa ta chatliechakohpa ta hmô awpa tlyma, viari thô awpa ta tlyma, biechhawhna thlai hnei awpa ta miah a tei tyh. Chavâta reipasaona he khôtho lâ tawhta a vya châ leipa ta, chhoh lâ tawhta a vaw puapa tiao a châ. Zamie ta, adyuhna nata ahryuna cha aohraohna vâta a vaw puapa a châ, a tah. (Zami

4:1). Chavâta Zisu ta, `chhôn lâ chyhsapa pathipalôh tawhta, pachâna moleipazy a kaw pua tyh. Apatlana, paruna, lainycheina, apheina, uahvana, chhiena, dôveina, parâna, kiaphaona, reipachhiena, apalaina nata hrunazy a vaw pua tyh. (Mt. 7:21-23).

Alôh leina: Sâtâ ta chyhsazy hry liata chi a pabupa cha Khazohpa Biehmeiseihpa chô liata a lôh lei awpa he a châ. Ngiapâ leina palôh moleina liata paopa ta Khazohpa hrohpa nama paosai pathlei awna, a sohsi teh u. (Heb. 3:12).

2. Reipasaona pahniena

Reipasaona atyhna he moleina châ hlei vei. Reipasaopa ta a ypa cha Khazohpa ta a hmâ haipa a châ, tagna ngiâna tlaô a châ.

1) *Reipasaona he chi awpa châ vei.*

Na chô liata a vaw tlôpa reipasaona he chyhsa hropa ta â tyh hrapa reipasaona hawhta a châ. Nama pahnie thei lei awpa ta reipasaona nâ tyh awpa Khazohpa ta pasaih vei. Reipasaona pahnie ta, a rêsai thei nawpa ta lâpi a tao aw. (I Kaw. 10:13). Ngiapâna liata â i via, reipasaona hluh via, tahpa a châ.

2) ***Reipasaona eima tyh viana kao:***

Sâtâ ta chyhsa a reipasao tita, eima chiehlei chaina kao nata palôh ta a aohraoh via tyhna kao â nua tyh. Chavâta eima sohsi thai kaw awpa a pha. Pity ta, `Palôh pasohpa ta y u la, a hrohrua teh u. Nama khakhaipa ahripa cha chakeibarôhhneipa a rôhpa hawhta a rôh ta, a nie thei awpa tluapa ta â khie tyh, a tah. (I Pity 5:8). Reipasaona eima tyhpa he, khataih su liata eima y tyh no ma? Kheihawhta daihti liata ma? Hâtâ liata noh khazie noh ma? O liata ma? Rai liata ma? Ahy nata ei y tyh no ma? Keima deita ta y no ma? Reipasaopa ta ei y no ta, ei palôh phaozie kheihawh ta a y? Cha hawhta eima pahno ha khihta cha "ahripa châta su parua khao lei awpa a châ." (Eph. 4:27). Chatawhcha na pheitlyna lâpi paraih la, moleina hmo tawhta na phei pasie ha mah y. (Bieso 4:26-27).

3) ***Reipasaona nâ tyh tita, Khazohpa lâ baona hiah teh.***

Khazohpa ta `na aw la, ei cha chhy aw', a tah. (Zer. 33:3). `Nôpona noh liata thlai na pado la, ei cha pachha aw.' (Hla 50:15).

4) ***Ahripa cha adyuh teh.***

Ngipâtuhsa hrona cha thlahpa lâ adyuhna hro a châ. Sâtâ cha Khazohpa Bie hmâpa ta adyuh awpa a châ. Ahripa reipasaona pahnie thei nawpa ta Khazohpa chariah chhaichhi kipa ta a tobi awpa a

châ. Khizaw liata reipasaona eima pia haipazy he, sapa nata thisaih a châ leipa vâta sapa thatlôna ta pahnie thaipa châ vei. Eima dyuh haipazy cha abeinazy, bieheinazy, zohna chô liata hmotaotheinazy, avâ su liata thlahpa moleipazy tiao ama châ. Chavâta Khazohpa chariah adyhna chhaichhi a châpa Biehmeiseihpa, adyhna Thâtihpa, adyhna pheikyh, ngiapôna vyhphao, pachhana lakhu, Thlahpa zaozi (Khazohpa bie) nata thlahchhâna ta adyuh awpa a châ.

Pachâ pahmaoh awpazy

1. Kheihawhpa kao liata Sâtâ ta chyhsa a reipasao tyh?
2. Nama pahnie thei leipa reipasaona nama tyh awpa pasaih vei, tah tlôh ta, khapa vâta e pahniepa ta eima y tyh?
3. Ahripa adyhna chhaichhizy rei tua teh?



BO – 28

MISSION CHAKAO AWPA TA TAOPA

Khazohpa ta su to liata a ypazy hnohta Thâtihpha roh pahâhpa patheisa awpa ta miah a hmâh (2 Kaw. 2:14). Chyhsa siapa thei cha hrona tho châ ta, a sopa chata chyhsa pathipalôh a pahnie tyh (Bieso 11:30).

Keimo cha Mission chakao awpa ta taopa nata awpa eima châ. Khazohpa ta khizaw liata rai a hriana liata ahlao awpa ta miah a khoh. Cha rai cha mission tahpa a châ. Zisu ta Paw lâta thlah a chhâ no ta “nâ ta khizaw lâta kei eina tuapa hawhna chi khata, kei chhao ta âmo (zituhpazy) cha khizaw liata ei tuah hih (Zhn. 17:18)” a tah. Kô (12)pa a châ no ta, Zisu ta ‘kei cha ei Paw o liata ypa ta ano rai ei hria awpa a châ’ (Lk. 2:49) tah ta, kô (33) a tloh nahta Kraws chô liata ‘ei raihria a ngoh haw’ (Zhn. 19:30) a tah.

Zisu hro chhôn nohzy liata a taopa nata chakaonazy kha, Awananopa ta a pazao lymâ awpa a châ. Krista ta khâkhaipa châna tawhta viasa ta miah tao ta, aryhna lyuchâpa raihriapa ta chyhsa zydua ano viasa ta taona mission rai miah a pie. Khazohpa kyhpachâna nata achhuahna khizaw lâta puuah awpa ta miah a tuah.

Khazohpa mission cha khapa vâta e a peimawh?

1. Alei chô liata Zisu raihria pazaona a châpa vâta;

ABeipa Zisu ta chyhsa to hnoh ta tao awpa rai rônahpa miah a pie. "Sie u la, pho to zydua pachupa ta tao u la, Paw nata Sawchapawpa nata Thlahpa Pathaihpa Moh ta bâti pachâsa teh u," (Mt. 28:19)a tah. Cha hawhta taona cha bie piepa zyhna châ ta, Khazohpa ypâna pakina chhao a châ.

2. Chakaona he Tovyuh rônahpa miakha a châpa vâta;

Mission chakaona he Tovyuh rônahpa sâkha a châ. Achhâ cha `Khazohpa rai hrialâhna nata Ano vyuhpa ta ra hriana' a châpa vâta (I Kaw 3:9). Zisu ta miah pachha haw ta, ano chhônkhâ liata miah pahlao ta, a Thlahpa Pathaihpa miah pie heih ta, chatawhta khizaw liata ano vyuhpa ta a duah pahroh awpa ta lyuchâpa rai miah a pie (II Kaw. 5:20).

3. Keimo ta eima tao theipa chakaona a châpa vâta;

Mission chahkao awpa he cancer nata Aids pasana patlâhna hawhta rairu pi châ hlei vei. Krista ta chhâzaw hrona miah a piepa chho pakawhna rai châ ta, chhâzaw âdaihpa nata mâ a hneipa hro piena a châ.

4. Hrona mâ hneizie chhopsiana a châpa vâta

Khizaw sôh nata hmodâh zydua leidia aw ta, Bie hmeiseihpa deikua alaiseih via lymâ aw. Molei rona nata ngiahthaina tawhta pathaopa ta Khazohpa achhy awpa, akaona hnei awpa, chieh leipazy deichhy ta chakao awpa, Krista lyuna hro hnei awpa nata mission chakaona he, hrona mâ hneizie miah pahnosatuhpa a châ.

Pachâ pahmaoh awpa:

1. Mara Awnanopa ta khapa vâta e mission eima chakao?
2. Mission chakao awpa ta khapa china e mia pakhâ?
3. Eima hrona a mâ hnei thei n'awpa ta kheita eima tao aw?



BO – 29

HRO KHOPATHLIAH THAINA

Chyhsa asoleipazy (hro mâ hneizie pahno leipazy)
hawhta y leipa u la, hrona liata taovyuh a y
tahpa pahnopa ta, nama yzie liata
a chado teh u (Eph. 5:15).

Khazohpa ta a chyhsa Awnanopla châta hmo
âchhuahpa sâ (5)pazy hry liata miakha ngâlâh zi ta,
a hropa diathla thaipa châ vei. A zydua zyh awpa a
châ. Awnanopa ta cha kyh liata eima hro
khopathliah thai awpa âbyuh.

Awnanopa hmiatuapazy ta he achhuahna mia (5)pa
he khopathliahpa ta ama hroh tahpa eima pahno.
Ngiapâtuhpazy cha lyuhchâpazy pachuna dao awpa
ta zy, akaona hnei awpa ta zy, viahchhâ pachhaih
awpa ta zy, thlahchâ awpa ta zy, phahnai khoh
ngaitapa ta y tyh ei ta. Lyuhchâpazy ta hmonoâhpa
nata ngiâna hluhpi ama tao. Chavâta chyhsa to ta
apostol-zy cha ama chiza. Ngiapâtuhpa zydua
hmaohkha ta y ei ta, hmo to a hly ei ta. Ama ryuzy,
ama sôhzy, zuah ei ta, amâ ngiahpa chyu hawhta
ama zydua ta a rai tyh ei ta. Noh chareih Achhyna
O liata palôh raoh ngaipa ta a pakhy tyh ei ta, ama
o lâta chhao, viahchhâ pachhaihpa ta thaphapa
nata pasai ngaitapa ta pati ama nie tyh. Khazohpa

reithai ei ta, chyhsa zydua modypa ta ama y tyh. Chatanachata pachha a châpazy cha, noh chareih ta Abeipa ta ama hnohta a baichha lymâ ei (Hmt. 2:42-47). Pawla chhao ta, Eph. 4:1-6 liata hrona he khopathliahpa ta hro awpa a peimawh zie a palâsa hra.

Khopathliahna hro tahpa cha he hawhta a châ.

1. Na pathipalôh tlokhuh ta Khazohpa cha kyhpachâ teh (Achhyna).
2. Bâti pachâsa teh u (Akaona) – Khazohpa chhônkha liata aly pangiana a châ.
3. Nâ kyh na pachâpa hawhta na vaih kyh pachâ teh (Chakaona).
4. Cha zydua tao awpa ta pachu lymâ teh u (Pachupa/zituhpa nata pitlohpa ta taona).
5. Sie u la, pho to pachutuhpa ta tao teh u. (Thâtihpha chhona – Evangelism).

Chyhsa pôhpa laiseih n'awpa ta vitamin châta niebaw pho to nie awpa âbyuh. Eima pahâsapa tihâh deita nie khiah, pôhkha pachiahpa thokha vitamin â phahla aw. Niedo chhao he khopathliahpa ta nie thai awpa âbyuh.

Ngiapâna liata Khazohpa ta hmosai miah a piepa a y. Keimo khopa deita moh leipa ta mohropazy khopa chhao moh tyh awpa ta, Pawla ta miah a pachu (Phil. 2:4). Local thokha liata cha Khazohpa achhuahna sâkha deita he hmia pasâh ei ta, a hropazy ama mo pakhô thlâh haw. Awnanopa

phapa, laiseihpa nata thatlôpa châ thei n'awpa ta sâ (5)zy pachâ ta, chakao awpa âbyuh.

Chyhsapa hrona liata Biepie rônah chaipa nata Raipie rônah chaipa he zi lymâ awpa a châ. He pachuna zydua liata eima y, y lei keimo tlai ta eima pasia tyh awpa a châ. Pity ta zikyu miah a râpa cha, "nama duahmo a ipa nama paosai pathlei lei n'awpa ta ryhpa papeisaleituhpazy paraona liata chhihthapa ta nama y lei n'awpa ta avaih teh u (2 Pity 3:17) a tah.

Pachâ pahmaoh awpazy:

1. Khopathliahpa ta hrona yzie chhopsia teh?
2. Nama local liata Khazohpa achhuahna liata kheihawhpa kao liata e nâma ngiah chaipa hawhta na pahno?
3. Hmt. 2:42-47 reih la, Khazohpa achhuahna pathluapathlâ teh.



BO – 30

KHIZAW PAHNO PHAPA MISAWNARI (Pahmôhpi hawhta avâ liata âzaw theipa Krizyhpa)

Khizaw zydua liata sie u la, hmotaopa
zydua hnohta Thâtihpha chho teh u
(Maka. 16:15).

Thlahpa Pathaihpa hneipa ta Thâtihpha chhona liata
cha, biereipa, hrozie nata hmotaopa ta chakaona
liata hmotaotheina a y tyh. Eima palôh Zerusalem
tawhta pathaopa ta, kaokih taihta Thâtihpha be
âduakheituhpa missionary eima vaw châ aw.

Khazohpa ta Monyuh misawnarizy hmâpa ta Mara
râh nata Mara chipho hnohta Thâtihpha a vaw
tlôkhei. Mongyuhpazy ta Marapa Kraws Pheisaihy
hmâpa ta râchhoh Thâtihpha phuahpa ta Awnanopa
ama vaw padua. Maraland Gospel Golden Jubilee
(1907-1957) liata Marapa zydua cha Kri vaw zyh
khai ha ei ta, Mararâh cha Immanuel râh tahpa ama
phuah. Immanuel râh liata a pahrâpa, chipho dua ta
Kri a vaw zyhpâ hnohta Khazohpa bie a vaw tlôpa
cha, “ Na poh o pakawh la, na pahrâna poh ozy
pakawh teh. A mochhih leipa la, na chaorizy paseih
la, na poh o tôhzy pa-i mah y (Isai 54:2)” tahpa a
châ.

Khazohpa achhuhpa lâpi cha alei chô liata pahnosa awpa nata a pachhana cha rân to liata pahnosa ta, phopizy ta Khazohpa ama reithai thei nawpa cha keimo taovyuh nata maohphaona a châ (Hlazy 67:2). Khazohpa ta taovyuh piepa a chakao khoh leipa phopi nata khinarah cha tlokhuh pahleipadia awpa a châ (Is. 60:12), Khazohpa ta a tah. Chakao awpa ta maohphaona hnei tlôh pi ta, diathlâ kawpa ta eima hria heih khiahta cha, chhiesa awpa châta a chakaopa eima châ aw (Zer. 48:10). Khazohpa tawhta tao awpa bie dao ha tlôh ta, a hria leipazy he thata ama hu a po. Byhnâ to khohta vâta ma eima chakao aw, Khazohpa achhuhpa pi patloh awpa ta ma?

Ngiapâtuhta thokha cha tovyuh phapa hmô awpa nata byhnâ to khohta vâta thlahchhâpa ta ama chakao tyh. Khazohpa ta miah a khokheipa cha "keimo châta deita a hrohpa châ khao leipa ta, khizaw châta hrona pie theipa" châ awpa he a châ. Khazohpa ta khizaw kyhpachâ ta a hrona a piepa hawh tlai ta (Zhn. 3:16), poh o pakawh ta kyhpachâna bâh pazawh awpa ta âhnawpa eima châ haw.

Khazohpa ta âchhuhpa pipatlohtuhta 'Khizaw Pahnopa Misawnari' tlyma, pahmôhpi hawhta avâ liata âzaw theipa krizyha eima châ thei nawpa ta, he hawhta eima pachâna pathlai awpa a châ.

1. Keima mo pakha châta pachâna tawhta mohropazy châta pachâkheina lâta:

Karâhneipa nata apalaipa ta khapahmâh tao leipa ta, keimo khopa dei moh leipa ta, mohropazy khopa chhao tiao moh awpa ta, Khazohpa bie ta miah a pachu (Philp. 2:3-4).

2. Keima chhôngkha châta pachâna tawhta chhôngkha hropazy châta pachâkheina lâta:

3. Eima khih châ deita ta pachâna tawhta khi hropazy pachâkheina lâta:

Zerusale khihpi liata chakâhna thata a tô no ta, Masidonia rân liata Awnanopazy ta riapha ngaitapa ta deichhyna sôh pahmaohpa ta Zerusale lâta ama paphao. Deichhyna piana kyh liata achyhta a piepa cha achyhta hmô awpa ta, a hluhpi a piepa cha a hluhpi a hmô pakhua aw, tahpa byhnâ tona hnawh chhao miah a pachu hra (2 Kaw. 9:6).

4. Eima chi nata pho châ deita pachâna tawhta phopi hropazy châta pachâna lâta:

Khazohpa ta na hiah la, phopi nata khizaw kaokih he ryu châta ei cha pie aw (Hla 2:8) a tah. Phopi sôh nata hneirôhna ahly thei awpa ta

(Is. 61:6), sie ta, phopi zydua pachupazy ta tao awpa a châ (Mt. 28:19).

5. Chyhsapa châta dei pachâna tawhta hmo hmotaopa zydua (hrohneipa, hnei leipa chhao) pachâna lâta:

Chyhsapazy moleina nata riepatisana vâta hmotaopa zydua he sawzeihpa pasa a taopa hawhta ama rôh ngâ thlâh ha. Chyhsazy ta Zisu vaw pahno ei sala, hmotaopazy mohôhpa ta ama vaw pabohsa awpa he, hmotaopazy ta hnabeiseihna ama hneipa cha ngiatiah leipa ta ama hâ thlâh haw (Rm. 8:19-25).

6. Eima râh châ deita ta pachâna tawhta khizaw kaoki châta pachâkheina lâta:

Khizaw zydua liata sie ta, Thâtihpha he chho awpa he Zisu biepiepa a châ (Mk. 16:15).

7. Hro chhôn châ deita pachâ khao leipa ta, avâ liata chhâzaw hrona kyh chhao pachâna lâta:

8. He khizaw tawhta Vârâh lâta a sie awpa eima châna kyh:

Khizaw he eima khitlyna nata khichhai châna su deita a châ. Eima khihsana hmeiseihpa cha vârh tiao a châ (Philp. 3:20).

Khizaw ta a pahnopa missionary rônahpazy he rietheina hluhpi taopa ta, tovyuh a pakytuhpazy ama châ. Tovyuh phapa hmô awpa vâta chakao leipa ei ta, ngâchhih kawpa ta taovyuh ama hriapasapa vâta Khazohpa tlaô a palyupalihpa a châ. Chavâta Mara Awnanopa chhao hawti palôh phaoh leipa ta, avâ liata âzaw ngâpa pahmôpi hawhpa missionary rônahpa eima châ thei nawpa Thâtihpa he kaokih taihta chho lymâ awpa a châ.

Pachâ pahmaoh awpazy

1. Chipho hropazy Marapa miah ama pahnona he Thâtihpa eima chhopa vâta a châ, tahpa na pyh ma?
2. Misawnari Rônahpa eima châ thei nawpa ta Marapa ta mission a chakaopa he, kheihawhta hmâhla via awpa na khoh?
3. Khizaw pahno phapa misawnari eima châ thei nawpa ta kheihawhta eima palôh eima pathlai/panano aw?

